

Linjiila Yeesu hande no Matiye winniri

Haala puddirka

Binnudo linjiila arandeha kaa do laati nun Yahuduujanjanjudo. Diga fuddoode, himbe e miili Matiye jaaboowo ceede faada nun winni linjiila kan. O laati nun bo gooto der aahiibe Yeesu sappo e dido. Yahuduubee nun o winnani. O hollitii dum e limitango be aayaaje Alkawal Kiinjal duudsde, kolittoje no Yeesu nun laatii kebbindo annabaakuji duuddi. Linjiila makko e jogii haalaaji mawdi feere feere.

Haala Laamaare Alla nun laatii dadol mannjol der ekkitinol Yeesu. Laamaare Alla nen Matiye bo noddala Laamaare kammu. Maytitaago noddugo mo «Bii Dawda», kan nun hollitinta dum. Yeesu laati nun laamiido mo annabiibe batani waran, kan laatii waaji Matiye. Woodube annal waddanii «laamiido Yahuduubee», dokke. Yeesu finii no Laamaare Alla faanake, tuubube, ko wayliti goonki mum, faami no e haajaa Alla walla dum, kambe nun laamaare nen laatanii.

Baa no laamiido on hollitii maaneeji Laamaare Alla e wadugo kaayefiji, o nyawti nyawbe, o nyaanni rafaabe, e non fu, himbe woppii mo hande no o batunoo de duuddsum kanko e hoore makko. Yahuduubee daartannoobe laamiido, faamay no e haani laamiido on tooroo.

No Yeesu finti, o holii no o laataaki laamiido Yahuduube tan. O wi'i: «Mi hokkaama baawde dow kammu e dow leydi fu».

Tokkontirki haalaaji

1. Kaakiraabe Yeesu e dingol mum, 1.1-2
2. Waaju e golle Yuhaana gadoowo batisi, 3.1-12
3. Wadugo Yeesu batisi e jarbeeki mum, 3.13-4.11
4. Golle Yeesu der Galili, 4.12-18.35
5. Ummaago Yeesu diga Galili, yahi Urusaliima, 19.1-20.34
6. Asaweere Yeesu sakitiineere, 21.1-27.66
7. Fintuki e hollitaaki Yeesu Joomiraawo, 28.1-20.

Inde kaakiraabe Yeesu (Luka 3.23-38)

¹ Nani do inde kaakiraabe Yeesu Almasiihu, taaniraawo Dawda, taaniraawo Iburahiima:

² Iburahiima rimi Isiyaaku, Isiyaaku rimi Yaakuubu, Yaakuubu rimi Yahuuda e miiraabe mum. ³ Yahuuda rimi Fares e Jara, kambe woni be o rindi e Tamar, Fares rimi Hisuruuna, Hisuruuna rimi Aram. ⁴ Aram rimi Aminadab, Aminadab rimi Nasuuna, Nasuuna rimi Salmuuna. ⁵ Salmuuna rimi Bo'es, mo o rindi e Rahab, Bo'es rimi Obed, mo o rindi e Ruutu, Obed rimi Yesa. ⁶ Yesa rimi Dawda, laamiido.

Dawda rimi Suleymaanu, inniko woni debbo mo Uriya acci. ⁷ Suleymaanu rimi Robo'am, Robo'am rimi Abiya, Abiya rimi Asa. ⁸ Asa rimi Yusafat, Yusafat rimi Yoram, Yoram rimi Ujiya. ⁹ Ujiya rimi Yotam, Yotam rimi Akas, Akas rimi Hejekiya. ¹⁰ Hejekiya rimi Manaasa, Manaasa

rimi Amon, Amon rimi Yusiya. ¹¹ Yusiya rimi Yekuniya e miiraabe mum. Wakkati mum nun Yahuduube egginaa, yaaraa leydi Babiila.

¹² Baawo no 6e jaara Babiila, Yekuniya rimi Salaatiyel, Salaatiyel rimi Jorobabel. ¹³ Jorobabel rimi Abihuda, Abihuda rimi Eliyakim, Eliyakim rimi Ajora. ¹⁴ Ajora rimi Sadok, Sadok rimi Akim, Akim rimi Eliyuda. ¹⁵ Eliyuda rimi Eliyaajaru, Eliyaajaru rimi Mattan, Mattan rimi Yaakuubu. ¹⁶ Yaakuubu rimi Yusufu, gorko Mariyama, inna Yeesu, bi'eteedo Almasiiihu.

¹⁷ Jaamanuuji sappo e naay nun wadi diga Iburahiima faa yottii Dawda. Diga Dawda faa yottii wakkati Yahuduube egginaa, yaaraa Babiila, wadii jaamanuuji sappo e naay. Diga Yahuduube egginaa yaara Babiila, faa yottii Almasiiihu, wadii jaamanuuji sappo e naay.

*Dingol Yeesu Almasiiihu
(Luka 2.1-7)*

¹⁸ Nani do no Yeesu Almasiiihu rimiraa. Mariyama inniiko, e laatii mo Yusufu dabbii. Amma ko 6e kawta, Mariyama hebii reedu e baawde Ruuhu Ceniido. ¹⁹ Yusufu dabbudo Mariyama e laatii neddo poonniitido. O yiday sentingo mo, den o resi salaago mo e cuudiidum. ²⁰ Wakkati o woni oo miijoo ka, malaykaajo Joomiraawo wari e makko, der koydool. Malaykaajo on wi'i mo: «Yusufu, taaniraawo Dawda, taa hulu ettugo Mariyama, debbo maa. Gam binjel nel o saawi, e Ruuhu Ceniido yiwi. ²¹ O riman biddo gorko, kokcaa mo inne Yeesu, gam o hisinan himbe makko diga hakkeeji maabbe.»

²² Dum fu, dsum wadii gam hebbingo haala ka Joomiraawo batuno diga e hunnuko annabijjo, o wi'i:

²³ «Gatol ɳol annaa gorko saawan, rima biddo gorko,
o wi'ete Emmanuwel.»

Maana inne nen woni: «Alla e wondi e meeden.»

²⁴ No Yusufu fini, wadi ko malaykaajo Joomiraawo bati dsum, o ɓaŋi Mariyama. ²⁵ Amma o hawtay e makko, faa nyaanne o rimi biddo gorko. Yusufu hokki mo inne Yeesu.

2

Woodube annal warii daarugo Yeesu

¹ Yeesu rimaama Baytilaama der leydi Yahudiya, wakkati laamiido Eroodu, go woodube annal yiwoy diga lettugal, wari Urusaliima. ² No ɓe jottii, ɓe yami: «Toy laamiido Yahuduube dimaado jooni on woni? Men ji'ii hoodere makko diga lettugal, men garii sujidango mo.»

³ No laamiido Eroodu nani habaru on, hakkillo mum jifii, kanko e himbe Urusaliima fu. ⁴ O noddini hooreebé limaamiibe, e moodisbe tawreeta fu, o yami ɓe, toy nun Almasiihu rimetee? ⁵ Be toontii mo, ɓe bi'i: «Baytilaama nun, der leydi Yahudiya, gam nani ko annabijjo winnunoo:

⁶ "An, Baytilaama der leydi Yahudiya,
a faanday caka ci'e Yahudiya mawde.

Gam ardotoodo yiwan diga e maa,
kanko nun durata himbe am Isira'iilaabe."»

⁷ Den, Eroodu noddini woodube annal ɓen e cuudiidum, yami ɓe ɓe laabinana dsum wakkati de hoodere nen hollitii. ⁸ Baawo mum, o lildi ɓe

Baytilaama, o wi'i ɓe: «Jahee, pumpitee habaru sukayel ɳel faa laaɓa. To on ji'ii ɳel, maatinee am, gam mi yaha, min bo, mi sujidana ɳel.»

⁹ No ɓe nani ka laamiido bati ɓe, ɓe jawti. Den, ɓe kollirii hoodere ne ɓe ji'unoo lettugal e ardi ɓe. No ne yottii nokkuure to sukayel ɳel woni, ne darii. ¹⁰ No ɓe ji'i hoodere nen, berde maɓbe welii puy. ¹¹ Be naati der wuro, ɓe ji'i sukayel e inna mum, Mariyama. Be jicci, ɓe cujjidani ɳel. Be pitti gineeqi maɓbe, ɓe kokkori ɳel kannjeeje, e wardi buudeteedum, e dacce luuttooje, bi'eteedé miir. ¹² Baawo majjum, Alla holli ɓe der koydool to ɓe bittu to Eroodu. Den ɓe kootiri leydi maɓbe e laawol gonjol.

Yusufu doggii suudoy Misira

¹³ No ɓe jawti, malaykaajo Joomiraawo holitanii Yusufu der koydool, wi'i mo: «Umma, ettu sukayel ɳel e inna mum. Doggidin ɳel, jahaa Misira, joododaa ton faa de bi'umaa mi gartaa. Gam Eroodu waran daartugo sukayel ɳel, gam halka ɳel.»

¹⁴ Yusufu ummii jemma, yaari sukayel ɳel e inna mum faa Misira. ¹⁵ O joodii ton faa de Eroodu maayi. Nun nun ka Joomiraawo batuno e hunnuko annabijjo hebbiri, de o wi'i:
«Mi noddii ɓiyam wurtoo diga Misira.»

Eroodu halkii sukaabe Baytilaama

¹⁶ No Eroodu faami woodube annal ɓen jammike dsum, mone makko ummii puy. O lili ɓe bara sukahon goron tawaakon Baytilaama e der jeyde makko fu, diga sukahon kecccon, faa kon duubi didi. O wadii düm, o fooni deydey wakkati

ki wooduse annal batuno mo dow hollitaago hoodere nen. ¹⁷ Dum hebbinii haala ka annabi Yeremiya batunoo, wi'i:

¹⁸ «Cimaali nanaama der siire Rama,
e bojji, e goytaali duuddi.

Rahiilu nun wullata, gam sukahon mum.
O nootaaki eyteego,
gam kon maayidii.»

Yusufu wittii Nasaratu

¹⁹ Baawo maayde Eroodu, malaykaajo Joomiraawo hollitanii Yusufu der koydool, der leydi Misira. ²⁰ O wi'i mo: «Umma, ettu sukayel ñel e inna mum, bitton leydi Isira'iila, gam yiñunoobe warugo suka on maayii.»

²¹ Den Yusufu ummii, etti sukayel ñel e inna mum, 6e bitti leydi Isira'iila. ²² Amma Yusufu nanii Arikilawus jabii laamaare baaba mum Eroodu, laamii dow Yahudiya. O huli yahugo ton. Ko Alla baddi mo der koydool, den o yahi far leydi Galili. ²³ O yahi o joodii siire wi'eteene Nasaratu. Dum laatike, gam hebbinga ka annabiibe batunoo, wi'i: «O noddete Nasaratujo.»

3

Waaji Yuhaana gadoowo batisi

(Marku 1.1-8; Luka 3.1-18; Yuhaana 1.19-28)

¹ Wakkati majjum, Yuhaana gadoowo batisi suppitii. Oo waajoo der ladde haro Yahudiya, oo wi'a:

² «Tuubee, gam Laamaare Alla faanake.»

³ Kanko nun annabi Esaaya batani, wi'i:
«Daane neddo e bata dow dow, der haro, e wi'a:
Moyyinee laawol Joomiraawo,

poonnitee laabi makko!»

⁴ Yuhaana e borninoo gineeji cannyiraadi leebi jeelooba, oo haabii belbelol gurol dow funjudu makko. Nyaamdu makko laatii babatti e juuri ladde. ⁵ Himbe Urusaliima, e leydi Yahudiya, e tawaabe takkol maayo Urdun fu, wari to makko. ⁶ Be tuubi hakkeesi maabbe, go Yuhaana wadii be batisi der maayo Urdun.

⁷ No o yi'i Farisaabe e Sadukiibe duubbe e wara Wadeego batisi, o wi'i be:

«Bibbe bolle pure! Moy tintini on doggon mone Alla waroore? ⁸ Gadee golle kollitooje on tuubii. ⁹ To on miilee e berde moodon bi'on: "Iburahiima nun woni maama amen!" Gam mii wi'a on, Alla e waawi waylitingo kaaye, de laatoo bibbe Iburahiima! ¹⁰ Jooni, jammere bantaama gam feyya ledde faa e dadi mum. Den, leggal njal rimataa bibbe boodde fu wuditinte, faddee der yiite. ¹¹ Min, e diyam nun gadiranmi on batisi, gam hollitingo on tuubi. Amma garoowo baawo am, e burimmi baawde. Mi fotay du baa jimminaago, borta paade makko. Kanko, o wadan on batisi e Ruuhu Ceniiido, e yiite. ¹² Oo jogii besirdum e junjo makko, o laabinan fiyirde makko. O loowa gawri der rummuure makko, o wula nyaane der yiite ne nyifataa.»

*Yeesu wadaama batisi
(Marku 1.9-11; Luka 3.21-22)*

¹³ Wakkati majjum, Yeesu yiwi Galili, wari maayo Urdun to Yuhaana, gam Yuhaana wada mo batisi. ¹⁴ Amma Yuhaana nootaaki, wi'i: «Min nun haajaa gadanaa batisi, ko an nun wari to am mi wadanee?»

15 Yeesu toontii mo, wi'i: «Noota dum laatoo non non jooni, gam hande non kebbinirten ko foonnitii fu.»

Den Yuhaana nootii. **16** Don maa don, no Yeesu wadaa batisi, wurtii e diyam, kammu ma  itii. O yi'i Ruuhu Alla e jippoo dow makko, hande tantabaraaru. **17** Don daane gom nanaa dow kammu, e wi'a: «Oo do nun laatii Biddo am jidaado, mo ceyoriimi.»

4

Seydan jarbake Yeesu (Marku 1.12-13; Luka 4.1-13)

1 Baawo majjum, Ruuhu Ceniido yaari Yeesu der haro gam Ibiliisa jarboo mo. **2** O suumii nyaloomaaje lasoy didi e jemmaaje lasoy didi. Den, rafo wadi mo. **3** Don Jarbotoodo on battii mo, wi'i: «To a laati nun Biddo Alla, batu kaaye dee do waylitoo peen.»

4 Yeesu toontii mo, wi'i: «E winnaa: "Neddo wuuriirtaa e peen tan, amma e haala burtiika diga hunnuko Alla fu."»

5 Ibiliisa yaari mo wannarde seniine, bili mo dow suudu Alla to buri towugo. **6** Den o wi'i mo: «To a laati nun Biddo Alla, fittu kodaa ley, gam e winnaa der dewtere, Alla batan malaykaabe mum  e ta  ee e juude ma  ee gam to koyde maa fergoo kaaye.»

7 Yeesu toontii mo, wi'i: «Dewtere wi'i kade: "Taa jarba Alla Joomiraawo maa".»

8 Ibiliisa yaari mo kade dow waanne towune puy. O holli mo laamaareeji duuniyaaru fu e

tedduñal majji. ⁹ Den o wi'i mo: «Mi hokkete huune dum fu, to a jiccake cujidandaa am.»

¹⁰ Yeesu toontii mo, wi'i: «Dillu diga dōn, an Iibiliisa, gam e winnii der dewtere:

“Sujidan Alla Joomiraawo maada, kanko tan teddintaa!”» ¹¹ Den Iibiliisa acci mo, go malaykaabe battii e jagganoo mo.

Yeesu waajake der leydi Galili

(Marku 1.14-15; Luka 4.14-15)

¹² No Yeesu nani Yuhaana gadoowo batisi nanjaama, wattaa der kasu, o witti leydi Galili.

¹³ O eggii Nasaratu, o joodoy Kafarnahum, takkol fonjo maayo Galili, hakkune jeyde leydi Jabulon e Neftali. ¹⁴ Hande non haala ka annabi Esaaya batunoo hebbiri, o wi'i:

¹⁵ “Leydi Jabulon e leydi Neftali,
joodiini takkol maayo, fonjo Urdun,
Galili, an laatiini joodorde himbe 6e lenyi janani.

¹⁶ Himbe tawaabe der niwre,
yi'ii jayñol manjol.

Joodiibe e leydi maayde, niibuni,
jayñol yaynanii dum.”

¹⁷ Diga wakkati majjum, Yeesu fuđdi waajaago e wi'a: «Tuubee, gam Laamaare Alla battike.»

Aahiiñe Yeesu arandeebe

(Marku 1.16-20; Luka 5.1-11)

¹⁸ No Yeesu woosotoo takkol fonjo maayo Galili, o yi'i suubotoobe liyyi dido, Simon, noddeteedo Piyer, e minyum Andere, e fadda taaruji mum der maayo. ¹⁹ Yeesu wi'i be: «Tokkee am, mi wadan on suubotoobe himbe.»

20 Don maa don ɓe acci taaruji maɓbe, ɓe tokki mo. **21** O yahi yeeso, o yi'i rindaabe dido der laana, Yaakuuba e minyum Yuhaana, ɓibbe Jebede. Kambe e baaba maɓbe, bee moyyina taaruji maɓbe. O noddi ɓe. **22** Don maa don, ɓe acci laana ɻan e baaba maɓbe, ɓe tokki mo.

*Yeesu e waajoo, e nyawta himbe
(Luka 6.17-19)*

23 Yeesu woositii leydi Galili fu. Oo janjina der cuudi baajordi, oo waajoo linjiila dow Laamaare Alla, oo nyawta himbe ɓe nyawuuji feere feere, e toorotoobe. **24** Habaru makko sankitii der leydi Siriya fu. Bee gaddana mo nyawbe nyawuuji feere feere, hande ɓe ginnaaji toorata, e yanoobe paddde, e moofidinbe, o nyawti ɓe. **25** Jama'aare duunne e tokki mo. Be yiway maa diga leydi Galili, e gaadeere Genniije Sappo, e Urusaliima, e Yahudiya, e fonjo maayo Urdun.

5

Waaji dow waanne

1 No Yeesu yi'i jama'aare duunne, o eenci dow waanne, o joodii. Aahiiɓe makko hawritii ley makko. **2** O fuddi waajaago ɓe, o wi'i:

*Haala barke
(Luka 6.20-23)*

3 «Barke laatanii ɓe yonki mum humpaa Alla, gam kambe nun jey Laamaare Alla!

4 Barke laatanii wulloobe, berde maɓbe fewtinte!

5 Barke laatanii digguube, gam ɓe donan leydi!

6 Barke laatanii rafaabe, e dondaabe foonnitaare, gam ɓe kaaran!

⁷ Barke laatanii endotoobe, gam 6e endete!

⁸ Barke laatanii 6e 6erde mum laabi,
gam 6e ji'an Alla!

⁹ Barke laatanii daartoo6e jam,
gam 6e noddete 6ibbe Alla!

¹⁰ Barke laatanii tooraabe gam sabbu foonnaare,
gam kambe nun Laamaare Alla laatanii!

¹¹ Barke laatanii on, to himbe yennii on, toorii on, takki on gaccee baadey fu, sabbu am. ¹² Ceyee, belbeltee, gam riiba mawka e hedii on dow kammu. Hande non annabiibe ardiibe on tooriaa.»

Lamdam e jaynjol

(Marku 9.50; Luka 14.34-35)

¹³ «Onon latii lamdam duuniyaaru. Amma to lamdam walaa dakam, e ume dam welinirtee? Dam nafataa godsdum, sey dam woppee, himbe yaaba dam.

¹⁴ Onon latii jaynjol duuniyaaru. Genni mahaani dow waanne suudataako. ¹⁵ Fitilla bo hubbataake gam ka ommee gummal. Amma ka 6ilete dow to fitilla 6iletee, gam ka yaynana wonube der suudu fu. ¹⁶ Hande non haani jaynjol moodon yaynira yeeso himbe. Den 6e ji'an golle boodde de gadoton, 6e teddina Baaba moodon gonudo dow kammu.»

Yeesu e janjina dow haala tawreeta

¹⁷ «To on miilee mi warii gam moytugo tawreeta, dum bo ko winnaa der dewte annabiibe. Mi waray moytugo ka, amma gam hebbinga ka. ¹⁸ E goonja batanmi on, dow e leydi heennyen, amma

toħbel, dum bo maasel gootel der tawreeta, sottintaake, faa nyalaane huune fu hebboyta. ¹⁹ Gam majjum, mo dowtanaaki toħbel gootel, burunjal faandfugo der tawreeta, go e ekkitina wobbe bo to dowtoo, o laatoto paandudo der Laamaare Alla. Amma dowtaniido tawreeta, go e janjina wobbe bo dowtanoo ka, joomum laatoto mawdo der Laamaare Alla. ²⁰ E goonja bi'anmi on, to foonnitaare mon buray ne moodibbe tawreeta e Farisaabé, on naatataa der Laamaare Alla pay.»

*Yeesu e ekkitina dow haala mone
(Luka 12.57-59)*

²¹ «On nanii ko kaakiraabé meeden wi'ano: "Taa waru neddo, barudo neddo fu, hiitete." ²² Amma min, mii wi'a on, jogoriido banniraawo mum mone fu, hiitete. Bi'udo banniraawo mum: "A walaa hoore," joomum yaarete yeeso hiitorde mawne. Bi'udo banniraawo mum "A haanja nun," o wattete der yiite jahannama. ²³ Gam majjum, to a yahii sakkanoygo Alla sadaka, to hiisirde, go ciwtordaa aa woodi gokka e banniraawo maa, ²⁴ accu don sadaka maa yeeso hiisirde. Den jahaa taw to banniraawo maa, jaafontiron. Baawo mum, bittaa, cakkaa sadaka maa. ²⁵ To goddo gaccake maa, go oon jaha to kiitotoodo, yawda nannantiraa e makko diga e laawol. To a waday dum, o wattete der juude kiitotoodo, den kiitotoodo bo wattee e juude sandaaji, maħbedaa der kasu. ²⁶ Mii batee e goonja, a wurtataako diga don, to a yoħiday nyamaane maa, faranwel mum korrijen.»

Ekkitinol dow jeenu

²⁷ «On nanii wi'aanoma: "Taa wadu jeenu!"
 28 Amma min, mii wi'a on, daarudo debbo fu, ko suunii mo, wadii jeenu e makko der 6erne mum. ²⁹ Gam majjum, to itere maa nyaamoore nun laatantee daliila doyyere, doofu ne, boppaa to woddi! Dum burante jokkulal 6annu maa gootal halka, e no 6annu maa fu naatirta der yiite jahannama. ³⁰ To junjo maa nyaamo nun laatantee daliila doyyere, wudditin ɻo, boppaa to woddi, dum burante jokkulal maa gootal halka, e no 6annu maada fu naatirta der yiite jahannama.»

Ekkitinol dow ceergal

(Matiye 19.9; Marku 10.11-12; Luka 16.18)

³¹ «Wi'aama bo: "Ceerudo debbo mum fu, sey hokka mo derewol ceergal." ³² Amma min kan, mii wi'a on, ceerudo debbo mum to hinaa gam daliila jeenu, to o hoowaama, o laatinii mo jeenoowo. Neddo koowudo debbo ceeraado fu, wadii jeenu kanun bo.»

Ekkitinol dow hunayeere

³³ «On nanii kade, kaakiraabe meeden wi'aama: "Taa firtu hunayeere maa, hebbin ne yeeso Joomiraawo." ³⁴ Amma min, mii wi'a on, to on kunee. To on kunoree kammu, gam ɻu laati nun gurol Laamaare Alla. ³⁵ To on kunoree leydi, gam ni laati nun jaabirdum koyde makko. To on kunoree Urusaliima, gam ni laati nun wanjarde Laamiido mawdo. ³⁶ To on kunoree ko'e mon bo, gam on baawataa rawningo, dum bo 6awlingo baa leebol gaasa mon gootol. ³⁷ Haala mon fu daroo dow: "oo", dum bo "aawo", to yawtu don. Ko 6eydii dow majjum fu yiwii diga e Kalludo.»

*Ekkitinol dow wattaago
(Luka 6.27-36)*

³⁸ «On nanii wi'aama, “Itere yobiree itere, nyiire yobiree nyiire.” ³⁹ Amma min, mii wi'a on, to on battee gadando on ko boni. To goddo fiyii maa meenyo dow golal nyaamowal, hokku mo ɳal to bo. ⁴⁰ To goddo gaccike maa, e yidi teeta dansikiire maa, accu mo o etta gulunfaare maa bo. ⁴¹ To goddo doolii maa doonanodaa dum doongal mum kuule ujuneere, roonana mo ɳal kuule ujune didi. ⁴² To goddo eelii maa, hokku mo. To goddo e yidi wuyaago huune maa, taa hadu mo dum.»

*Jidee waybe moodon
Luka 6.27-28*

⁴³ «On nanii wi'aama: “Yidu banniraawo maa, banyaa ganyo maa.” ⁴⁴ Amma min, mii wi'a on, jidee waybe moodon, du'anee tooranbe on. ⁴⁵ Hande non, laatortodon ɓiɓbe Baaba moodon gonudo dow kammu. Gam oo fudina naanje dow yeeddube e hallube. Oo tobina bo diyam gam foonnitiibe e be foonnitaaki. ⁴⁶ To oon jidi yidube on tan, riiba kaye keboton? Baa jabooбе ceede faada bo e wada hande non! ⁴⁷ To oon canna banniraabe moodon tan, ko haaynii ume gadoton don? Baa heeferbe bo e wada hande non! ⁴⁸ To non, laatee hebbube, hande no Baaba moodon mo dow kammu laatorii kebbudo.»

6

Ekkitinol dow wallugo talakaabe

¹ «Kakkilee, to on kollitee gadu moodon geetu yeeso himbe gam ji'edon. To on gadii dum,

on kebataa riiba to Baaba moodon gonudo dow kammu.

² To non, to aa hokka sadaka, taa fiyu lenjuru gam himbe yi'ee. Non non nun munaafitiibe wadata der cuudi baajordi, e sera laabi. Bee gada dum gam himbe mana be. E goona batanmi on, be kebii ko riiba maabbe. ³ Amma, to aa hokka sadaka, taa accu junjo maa nano anna ko nyaamo wadata. ⁴ To a wadii dum, sadaka maa laatoto e cuudiidum. Den Baaba maa ji'oowo ko woni der cuudiidum, yobete dum.»

*Ekkitinol dow du'aare
(Luka 11.2-4)*

⁵ «To oon du'oo, to on gadee hande no munaafitiibe wadata. Kambe bee jida du'aago e darorii der cuudi baajordi, e ate cele, gam himbe fu yi'a be. E goona batanmi on, be kebii riiba maabbe ko. ⁶ Amma an, to aa du'oo, naatu suudu maa, maabbaa dammugal, eelaa Baaba maa e cuudiidum. Den, Baaba maa ji'oowo ko woni der cuudiidum, yobete dum.

⁷ To oon du'oo, to on duudinee haalaaji di galaa nafuwe hande no heeferbe wadata. Bee miili to be duudinii haalaaji, Alla toontoto be. ⁸ Gam majjum to on nandee e maabbe, gam Baaba moodon e anni ko kaajadon diga on eelay dum.» ⁹ «Nani do no haani du'orodon:

“Baaba amen tawaado dow kammu,
inne maa e senii.

¹⁰ Laamaare maa wara.

Sago maa laatoo dow leydi,
hande no jo laatorii dow kammu.

¹¹ Hokku men nyaamdu keyannu men hanne.

¹² Yaafana men hakke amen,

hande no minon bo men jaaforanto woofananþe
men.

¹³ Taa accu men naata der jarbeeji,
amma hisin men diga e Kalludo.

[Gam an nun laamaare, e baawde,
e tedduñal fu woodani faa abada. Aami!]»

¹⁴ To on jaafanake himþe boofi mum, Baaba
moodon gonudo dow kammu yaafanto on onon
bo. ¹⁵ Amma to on jaafanaaki himþe, Baaba
moodon bo yaafantaako on boofi moodon.»

Yeesu e ekkitina dow suumayeere

¹⁶ «To oon cuumoo, to on jurmikinee hande no
munaafitiþe waadata. Bee jiba geese maþþe gam
himþe annita bee cuumii. E goonja batanmi on, þe
kebii ko riiba maþþe. ¹⁷ Amma an, to aa suumii,
sulma, bujodaa wardi. ¹⁸ Den himþe annitintaa
naa aa suumii. Amma Baaba maa mo yi'ataake
tan anni. Baaba maa ji'oowo ko gadudaa der
cuudiidum, kanko yobetee.»

Jawdi dow kammu (Luka 12.32-34)

¹⁹ «To on kawritanee ko'e mon jawdi der duu-
niyaaru, to mooyi e guyuhon biisata ni, ðum bo
to wuyþe yulata cuudi mon, wujja ni. ²⁰ Amma
kawritanee ko'e mon jawdi dow kammu, to
guyuhon e mooyi biisataa ni, wuyþe bo heþataa
wujja ni. ²¹ Gam to jawdi maa woni, don berne
maa bo wonoto.»

Haala jaynjol e niwre (Luka 11.33-36)

²² «Gite woni fitilla 6annu. To gite maa e yandi,
6annu maa fu, wonoto der jaynjol. ²³ Amma to

gite maa yandaa, 6annu maa ŋol fu, ŋol wonoto der niwre. Den, to jayŋol gonuŋol der maa laatike niwre, a yi'ii don no niwre mawniri!»

Alla e jawdi
(Luka 16.13)

²⁴ «Walaa baawoowo ko jagganii joomiraabé dido, gam o wanyan oo do, o yida oo to, o takkontiran e oo do, o yawoo oo to. On baawataa ko jagganii Alla, e jawdi.»

Hoolaago Alla
(Luka 12.22-31)

²⁵ «Gam majjum bi'anmi on: To on cukulanee yonkiiji moodon dow ko nyaamoton e ko jaroton. To on cukulanee balli moodon dow ko bornotodon. Yonki 6uraa nyaamdu na? Bannu 6uraa koltal na? ²⁶ Daaree pooli piirooji: Di aawataa, di dug-gataa, di galaa rummuure. Amma e non, Baaba moodon gonudo dow kammu e nyaanna di. On 6uraa pooli tedduŋal na? ²⁷ Moy e moodon der billaaje mum waawata ko 6eydi balde mum, baa mayyande woore?

²⁸ To non, gam ume ko oon cukulana kolte? Daaree no pinniji gese mawnirta: Di mottataa, di cannyataa. ²⁹ Amma mii bata on, baa Suleymaanu e tedduŋal mum fu, bornaaki kolte boodude hande no pinniji din gootel mum. ³⁰ To Alla e holtina kudooji ladde tawaadi hanne, jaano di bulee yi-ite, o holtintaa on 6ura non non na? Onon 6e goondinki paanduki! ³¹ To on cukulee bi'on: «Ume nyaameten? Ume jareten? Ume bornotoden?» ³² Gam kujje dee, heeferbe nun daartata de. Amma Baaba moodon gonudo dow kammu, e anni oon

goodi haaje majje. ³³ Daartee aran Laamaare Alla, e foonnitaare makkoo. Den ko horii fu, on belydante dum. ³⁴ To on cukulanee gam jaanjo, jaanjo sukulanto hoore mum. Nyalaane fu, toora mum heyii dum.»

7

*Hiitaago wobbe
(Luka 6.37-38, 41-42)*

¹ «To on kiitee wobbe, gam to Alla hiitoo on.
² Gam no kiitoridon wobbe, non kiitortedon. Etorde etirandon wobbe, kayre etirantedon. ³ Ume wadi go aa daara kudeel der itere banniraawo maa, go a faamanay legga gonuña der itere maa?
⁴ Noy baawirtaa ko wi'i banniraawo maa: "Accumi ikkinanee kudeel gonuñel der itere maa", nani bo, legga e woni der ne maa? ⁵ Munaafitijo, ikkin legga gonuña der itere maa taw, den gite maa laabaa, kebaa no ikkinirdaa kudeel gonuñel der itere banniraawo maa.

⁶ To on kokkee dawaadi ko senii, gam to dí bittoy dí ñata on. To on cankitee kaaye moodon dime yeeso afaaaji, gam to dí jaabu de.»

*Alla e toontoo eelanbe dum
(Luka 11.9-13)*

⁷ «Eeleee, on keban, daartee, on jiitan, cilminee, on mañbitante. ⁸ Gam eeloowo fu, heban, daartoowo fu, yiitan, piyoowo dammugal fu, mañbitante. ⁹ Moy caka moodon to biyum eelii dum peen, hokka mo hayre? ¹⁰ Dum bo to o eelii mo linnol, o hokkan mo boddi? ¹¹ Onon hallube, oon baawi hokkugo biññe moodon dokke boodde,

hakko Baaba moodon gonudo dow kammu. Oo hokka eelanbe mo fu dokke boodde.

¹² Gam majjum ko jidufon himbe wadana on fu, onon bo, gadanee be dum. Kanjum woni ekkitinol tawreeta e dewte annabiibe.»

*Dammugal paanduŋal
(Luka 13.24)*

¹³ «Naatiree dammugal paanduŋal, gam dammugal jaajunjal e laawol koyunjal, e yaara der halkere, himbe duubbe nun tokki ɻol. ¹⁴ Amma dammugal paanduŋal, e laawol billiŋol, e yaara to yonki, yiitube ɻol duudaa.»

*Hakkilango annabiibe fewrekuuþe
(Luka 6.43-44)*

¹⁵ «Kakkilanee annabiibe fewrekuuþe. Be garan to moodon, bee bornii guri baali, amma der maþbe, bee laatii bu'i ladde bonudi. ¹⁶ E gadu maþbe annitirton be. Innabooje borataake dow gi'e, ibbe bo borataake dow gi'e danehi. ¹⁷ Leggal boodunjal fu riman biþbe boodde, amma leggal kallunjal riman biþbe kallude. ¹⁸ Leggal boodunjal waawataa ko rimi biþbe kallude, nun bo leggal kallunjal waawataa ko rimi biþbe boodde. ¹⁹ Leggal fu ɻal rimataa biþbe boodde wudditinte, faddee der yiite. ²⁰ Hande non, annitirton be diga e gadu maþbe.»

*Mi annaa on abada
(Luka 13.25-27)*

²¹ «Hinaa wi'ooþe am “Joomiraawo, Joomiraawo” fu naatata Laamaare Alla, sey wadooe ko Baaba am gonudo dow kammu yidi tan. ²² Nyalaane darnjal, duubbe wi'an am: “Joomiraawo, Joomiraawo! E inne maa nun men

gadiri annabaaku. E inne maa nun men diiwiri ginnaaji. E inne maa nun men gadiri haaynaareeji duuddi.” ²³ Wakkati mum, mi toontoto ɓe: “Mi annaa on abada. Boddee am, onon wadoobe ko halli!”»

Cuudi didi
(*Luka 6.46-49*)

²⁴ «Hande non, neddo fu kettiniido haala am, go e gollira ka, e nandi e neddo kakkildo, mahudo suudu mum dow tepaare. ²⁵ Diyam tobi, gooruuj hebbi, keni mawdi wifi dow maggol. Amma ɳol yanay, gam dow tepaare nun ɳol daddaa. ²⁶ Amma kettiniido haala am fu, go tokkay ka, e nandi e neddo mo walaa hakkillo, mahudo suudu mum dow jaaneeri. ²⁷ Diyam tobi, gooruuj hebbi, keni mawdi wifi dow maggol. Den ɳol yani yanande mawne.»

Baawde Yeesu

²⁸ No Yeesu heennyi waajuuji din, haaynaare nannji jama'aare puy gam waaji makko. ²⁹ Gam o janjinirii ɓe e baawde, hinaa hande no moodiibee tawreeta janninirta.

8

Yeesu nyawtii ceccefo gom
(*Marku 1.40-45; Luka 5.12-16*)

¹ Yeesu jippoyii diga dow waanne, go jama'aare duunne e tokki mo. ² Wakkati mum, ceccefo gom wari, jicci yeeso makko, wi'i mo: «Joomiraawo, to aa yidi, a waawan ko nyawtimmi.»

³ Yeesu foorti junjo mum, meemi mo, wi'i: «Mii yidi, nyawta!» Don maa don, gorko on nyawtii.

⁴ Den Yeesu wi'i mo: «Hakkil! Taa batu ka goddo.

Amma yahu holloy hoore maa limaamijjo. Den, gadaa sadaka ka Muusa wi'i on gadon, gam anni-naa ɓe a yoofake.»

*Yeesu nyawtii jaggiido hooreejo soogeeji Roma
(Luka 7.1-10; Yuhaana 4.4-54)*

⁵ Yeesu e naata siire Kafarnahum, don hooreejo soogeeji gom ɓattii mo, eeli mo, wi'i: ⁶ «Joomiraawo, jaggiido am na'on fukkii wuro, yandaa, faa juude e koyde fu waatii, oo naawee sanne!» ⁷ Yeesu wi'i mo: «Mi yahan, mi nyawta mo.» ⁸ Amma hooreejo soogeeji on toontii, wi'i: «Joomiraawo, mi fotay naataa wuro am. Amma batu woliine woore tan, jaggiido am yoofoto. ⁹ Min e hoore am, mii woodi mawbe ɓe dowtanii mi, min bo mii woodi dowtaniibe am. To mi wi'i, oo do, "yahu", o yahan. To mi wi'i, oo to, "war", o waran. To mi wi'i, jaggiido am, "wadu nii", o wadan.»

¹⁰ No Yeesu nani ka, haaynaare nanji düm, wi'i tokkuɓe düm: «E goona batanmi on, mi yi'ay iri goondinki kii do dow goddo, baa der Isira'iilaabe. ¹¹ Mii bata on, duubbe waran diga lettugal e gorgal. Be joosodo e Iburahiima e Isiyaaku e Yaakuubu, ɓe nyaamda der Laamaare Alla. ¹² Amma laatiibe ɓibbe Laamaare, fađete yaasi, der niwre. Ton ɓe bullata, ɓe yakkontira nyiye.»

¹³ Baawo mum, Yeesu wi'i hooreejo soogeeji on: «Hootu! Dum laatanee hande no goondinirdaa.» Wakkati mum, jaggiido makko yoofii.

*Yeesu nyawtii nyawbe ɗuuubbe
(Marku 1.29-34; Luka 4.38-41)*

¹⁴ Yeesu yahi wuro Piyer. O tawi esiraawo Piyer debbo e fukkii, e yontaa. ¹⁵ Yeesu meemi junjo

makko, yontere nen acci mo. Den o ummii, oo jagganoo ɓe.

¹⁶ No kiikiide wadi, Yeesu waddanaa himbe duiubbe, ɓe ginnaaji woni e mum. O riiwi di e haala makko, o nyawti nyawbe fu. ¹⁷ Hande non haala annabaaku Esaaya hebbiri, ka o wi'i:
 «O jaɓii roonaago tampe meeden,
 o nyawtii nyawuuji meeden.»

*No haani Yeesu tokkiree
 (Luka 9.57-60)*

¹⁸ Yeesu yi'i jama'aare duunne e huuritii dum, o wi'i aahiiɓe makko ɓe jola fonjo far to. ¹⁹ Don Moodibbo tawreeta gom battii mo, wi'i: «Moodibbo, mi tokkete to jahataa fu.»

²⁰ Yeesu wi'i mo: «Dondondehon e woodi gayde, pooli bo e woodi dadda mum, amma Bii neddo woodaa to fukkinta hoore mum gam siwtoo.»

²¹ Goddo diga caka aahiiɓe wi'i mo: «Joomiraawo, accu mi yaha, mi uwaa baaba am taw.»

²² Yeesu toontii mo, wi'i: «Tokkam, accu maaybe uwa maaybe mum.»

*Yeesu deyyitinii hennu
 (Marku 4.31-41; Luka 8.23-25)*

²³ Yeesu naati der laana diyam, go aahiiɓe makko e tokki mo. ²⁴ Don maa don, hennu mawkol ummii e wifa dow maayo. Nol wifi, faa galmaaji diyam e yidi mutina ńja. Amma Yeesu e daani. ²⁵ Aahiiɓe battii mo, finnini mo, wi'i: «Joomiraawo, faaba men! Men na'on kalka!»

²⁶ O toontii ɓe, o wi'i: «Gam ume ko kuludon? Onon ɓe goondinki paanduki!» Den, o ummii, o falmi hennu e maayo. Dum yeewi siriw! ²⁷ Be fu,

haaynaare nanji 6e, 6ee bi'a: «Iri moy nun oo do, faa hennu e maayo e dowtanoo mo?»

*Yeesu nyawtii ginnaajiibē dido
(Marku 5.1-20; Luka 8.26-39)*

²⁸ Yeesu joli fonjo maayo, yottii der leydi Gadarena. Don worbe dido woodube ginnaaji wurtii e caabeeje, fotti e makko. Bee kunnii puy, faa goddo suusataa ko tokki laawol njol. ²⁹ Be darii 6ee bata e semme, 6ee bi'a: «An Biddo Alla, ume jifudaa wadugo men? A warii do gam tooraa men diga wakkati waday na?»

³⁰ Fotii darne afaaji mawne gom e durannoo takkol don. ³¹ Ginnaaji din eeli Yeesu, wi'i: «To a riiwii men, accu men naataa der darne afaaji nee do.»

³² O wi'i 6e: «Jahee!» Ginnaaji din wurtii, naatoy der afaaji din. Don maa don, darne afaaji nen fu diirtii diga takkol waanne, simmitii der maayo, yoolii e diyam.

³³ Duroobe afaaji din doggi, hooti wuro. Be batoy ko wadi fu, e ko wadi woodube ginnaaji dido ben. ³⁴ Den, himbe siire nen fu wurtoy fotti e Yeesu. No 6e ji'i mo, 6e eeli mo o wurtoo leydi maabbe.

9

*Yeesu nyawtii moofo
(Marku 2.1-12; Luka 5.17-26)*

¹ Yeesu naati laana diyam, joli, witti der siire mum. ² Himbe waddani mo moofo, pukkinaado dow daago. No Yeesu yi'i goondinki maabbe, wi'i

moofo on: «Suka am, tiidin 6erne maa! Hakkeeji maa yaafaama!»

³ Den, moodibbe tawreeeta wobbe yanti e miila der berde mum, e wi'a: «Gorko oo do e bata kalluka dow Alla!» ⁴ Yeesu e anni miilooji maabbe, o wi'i 6e:

«Gam ume go oon miila miilooji kalludi dii der berde moodon? ⁵ Ume 6uri hoyugo? wi'ugo: "Hakkeeji maa yaafaama," naa wi'ugo: "Umma yahu?"

⁶ Amma, mii yidi paamon, no Bii neddo e woodi baawde yaafaago hakke der duuniyaaru do.» Den, o wi'i moofo on: «Umma, ettu daago maa, hootu wuro maa!»

⁷ O ummii, o hooti wuro makko. ⁸ No jama'aare yi'i dum, huli, darii e teddina Alla gam o hokki himbe baawde hande dee.

*Yeesu noddii Matiye
(Marku 2.13-17; Luka 5.27-32)*

⁹ Yeesu e yawta, diga e laawol o yi'i gorko bi'eteedo Matiye e joodii to ceede faada yobetee, o wi'i mo: «Tokkam.» Matiye ummii, tokki mo.

¹⁰ Baawo mum, Yeesu yahi e nyaama der wuro Matiye. Jaboobe ceede faada duubbe, e wadoobe hakke wari joodii e nyaamida e Yeesu e aahiibe mum. ¹¹ No Farisaabe yi'i dum, be bi'i aahiibe makko: «Gam ume moodibbo moodon nyaamidinta e jaboobe ceede faada, e wadoobe hakke?»

¹² Yeesu nani ka, wi'i 6e: «Yandube haajaaka nyawtoowo, sey nyawbe. ¹³ Jahee ekkitee ko haala kaa do yidi wi'ugo: "Yurmeene nun jidumi, sadakaaji bane."» Gam mi waray noddugo fooniitiibe, amma hakkeebe.

*Yande dow suumaye
(Marku 2.18-22; Luka 5.33-39)*

¹⁴ Den, aahiiþe Yuhaana gadoowo batisi 6attii Yeesu, yami mo, wi'i: «Ume wadi minon e Farisaabe emen cuumoo, go aahiiþe maa suumataako?»

¹⁵ O toontii 6e, o wi'i: «Noddinaabe 6angal waawan ko woni der biisere 6erne to jommanjo gorko e wondi e mabþe na? Nyalaane waraan de jommanjo gorko on ettetee caka mabþe. Den 6e cuumoyo.

¹⁶ Walaa takkoowo lefol kesol dow wudere hinne, gam lefol kesol foodan wudere hinne, den cerkol mayre yaajan puy. ¹⁷ Kade bo innabojam kesam loowataake der jollooji guri kiiddi. To hinnaa non, jollooji din pusan, innabojam reyyitoo, jollooji din bo halka. Amma innabojam kesam, sey loowee der jollooji guri kesi, gam dum fu dum dada.»

*Suka debbo gom e debbo meemudo toggoore
Yeesu
(Marku 5.21-43; Luka 8.40-56)*

¹⁸ Wakkati Yeesu woni e bata 6e ka, don hooreejo suudu waajorde gom yottii, jicci yeeso makko, wi'i: «Biyam debbo maayii, dum wadii tifere. Amma war yowu junþo maa dow makko, heþa o wuura.»

¹⁹ Yeesu ummii e aahiiþe mum, tokki mo.

²⁰ Den debbo gom, mo lefol mum salii ko haggii diga duuþi sappo e didi, yiwi 6awbawre Yeesu, meemi kommulol toggoore makko. ²¹ Gam o miilii der 6erne makko, o wi'i: «To mi hebii meemumi baa kommulol toggoore makko, mi yoofoto.» ²² Yeesu yeeyitii, yi'i mo, wi'i: «Suka am,

tiidin 6erne maa! Goondinki maa nyawtii ma.»
Wakkatiire nen, debbo on yoofii.

²³ Yeesu yottii wuro hooreejo waajorde on. O yi'i fuuroobe puuraadī maayde e himbe wulloobē.
²⁴ O wi'i 6e: «Burtee diga do. Suka on maayay, o daani nun.» Be darii bee jala mo. ²⁵ No himbe wurtinaa yaasi, o naati der suudu, o nannjī junjō suka debbo, go o ummii. ²⁶ Habaru majjum sanki-tii toy fu der leydi nin.

Yeesu wuntinii wumuþe dido

²⁷ No Yeesu yawtata, wumuþe dido tokki mo, e bata e daane towne, e wi'a: «Bii Dawda, yurma men!»

²⁸ No o naati suudu, wumuþe 6en battii mo, o wi'i 6e: «Oon goondini mi waawan ko wadi dūm na?» Be toontii mo, 6e bi'i: «Oo, Joomiraawo, emen goondini.» ²⁹ Den, o meemi gite mabbe, o wi'i: «Dum laatanoo on hande no goondinirdon.» ³⁰ Den 6e bumti. O waggini 6e, o wi'i: «To on batee ka baa godðo.» ³¹ Amma no 6e burtii, 6e jahi 6ee cankita habaru makko der leydi nin fu.

Yeesu nyawtii muumo

³² No wuntinaabe 6en wurtotoo, Yeesu waddanaa gorko mo ginnool muumidini. ³³ O riiwi ginnool ñol, muumo on yanti e bata. Jama'aare fu haaydinii, e wi'a: «Iri dūm do meeday ko yi'aa der Isira'iila!» ³⁴ Amma Farisaabe wi'i: «E baawde hooreejo ginnaaji nun o riiwirta ginnaajil!»

Yeesu yurmake jama'aare

³⁵ Yeesu e woositoo der genneele mawde, e ci'on petton fu. Oo janñina der cuudi baajordi, oo fiina linjiila Laamaare Alla, oo nyawta nyawþe

nyawneeji feere feere fu. ³⁶ No o yi'i jama'aare, 6e jurminii mo, gam 6e comii, 6e tampi, 6ee laatii hande baali di galaa duroowo. ³⁷ Den, o wi'i aahiiibe makko: «Ko ruggetee e duudi, amma ruggoobe duudaa. ³⁸ Eelee Joomiraawo dugge lildaaruggooobe der to ruggantee.»

10

Aahiiibe Yeesu sappo e dido
(Marku 3.13-19; Luka 6.12-16)

¹ Yeesu noddi aahiiibe mum sappo e dido. O hokki 6e baawde riiwugo ginnaaji e nyawtugo nyawbe nyawuuji feere feere fu. ² Inde lilaabe sappo e dido ben woni: Simon noddeteedo Piyer, e minyum Andere. Yaakuuba 6ii Jebede, e minyum Yuhaana. ³ Filippu e Bartolome, Toma e Matiye jaoboowo ceede faada. Yaakuuba 6ii Alfee, e Taddee. ⁴ Simon tinniido gam Alla, e Yahuuda Iskariyot, jammoytoodo Yeesu.

Yeesu lili aahiiibe mum sappo e dido
(Marku 6.7-13; Luka 9.1-6)

⁵ Yeesu lili aahiiibe mum sappo e dido, bati 6e haalaaji dii do, wi'i: «To on jahee to heeferbe, to on naatee bo der siire Samariyaabe. ⁶ Amma jahee, caka Isira'iilaabe, laatiibe hande baali majjudi. ⁷ To jahudon fu, piinee, bi'on: "Laamaare Alla battike!" ⁸ Nyawtee nyawbe, pintinee maaybe, joofinee sessebbe, diiwee ginnaaji. On kebii on jobay, onon bo kokkee to on jabee godsum. ⁹ To on jaaree kanjeeri, dum bo cardi, maa bo ceede der jiibaaji moodon. ¹⁰ To on jogee bogooru, dum

bo toggoanje dīdī. To on ettee pade, dum bo sawru. Gam gollotoodo e haani nyaama.

¹¹ To on garii der genni, dum bo siire gom, daartee beero geeto. Joodee to makko faa de jawtudon. ¹² To oon naata der wuro, cannee tawaabe don. ¹³ To wuro ḥon e haanani dum, jam moodon naata der maggo. Amma to ḥo haananaa dum, jam moodon wittana on. ¹⁴ To on jaħaaka, on kettinanaaka bo, burtee don, piddon sollaare koyde moodon. ¹⁵ E goonja batanmi on: “Nyalaane darnjal, kiita Sodoma e Gomora buran hoyugo dow kiita siire nen.” »

*Tooraaji garooji
(Marku 13.9-13; Luka 21.12-17)*

¹⁶ «Kettinee! Mii lila on hande baali caka bu'i. To non, laatee yoyubē hande bolle, laatodon 6e walaa gacce hande tantabaraaji. ¹⁷ Kakkilanee ko'e moodon e himbe, gam 6e jaaran on yeeso kiitorde, 6e piya on looci der cuudi mabbe baajordi. ¹⁸ Be jaaran on yeeso mawbe leydi, e laamiibē genni, sabbu am. On laatanto am seedeebe yeeso mabbe, e yeeso heeferbe. ¹⁹ To on jaaraama yeeso hiitotoobe, to on miilee no batiroyton e ka batoyton. Gam on kokkete ka batoyton wakkati mum. ²⁰ Onon bane batata, Ruuhu Baaba moodon nun batata diga e moodon.

²¹ Mawniraawo ummanto miiraawo, acca o wa-ree. Baaba bo wadanan dum biibbe mum. Biibbe bo ummanto saareeji mum, wada dabare gam 6e baree. ²² Himbe fu wanyan on gam am. Amma munyudo faa heennyitirde, joomum hisinte. ²³ To on tooraama e genni nii do, doggiree nii to. E

goonja batanmi on, on keenyataa woositaago geneele Isira'iila, go Bii neddo wara.

²⁴ Aahijjo ɓurataa moodibbo mum, maccudo ɓurataa joomiraawo mum. ²⁵ E woodi aahijjo laatoo hande moodibbo mum, maccudo bo, hande joomiraawo mum. To hooreejo wuro noddaama "Beljebul" hakko himbe wuro makko!»

*Hoolaago Alla
(Luka 12.2-9)*

²⁶ «To on kulee himbe. Ko suudii fu wurtitinto, asiiri bo suppitinto. ²⁷ Ka batumi on der niwre, batitee ka caka nyalooma. Ka batadon e noppo der asiiri, piinee ka dow doomode cuudi. ²⁸ To on kulee waroobe bannu, be baawataa ko wari yonki. Amma, kulee baawoovo ko halki bannu e yonki fu der yiite jahannama. ²⁹ Colon didon sippataake faranwel gootel na? Amma baa gootel makkon yanataa e leydi, to e sago Baaba moodon bane. ³⁰ Onon, baa gaasaaji ko'e moodon fu e limaa. ³¹ Gam majjum, to on kulee, gam oon buri colon duukkon teddujal.

³² Ceedaniido am yeeso himbe, min bo, mi seedanto joomum yeeso Baaba am gonudo dow kammu. ³³ Amma caliido am yeeso himbe fu, min bo, mi saloto joomum yeeso Baaba am gonudo dow kammu.»

*Yeesu woni daliila ceennirgu
(Luka 12.49-53; 14.26-27)*

³⁴ «To on miilee jam nun gaddumi e duuniyaaru. Mi waray gam mi wadda jam, amma kaafahi gaddumi. ³⁵ Ko waddimmi woni, seennugo biddo gorko e baaba mum, biddo debbo bo e inna mum,

debbo ɓanjaado e esum debbo. ³⁶ Neddo fu, himbe wuro mum nun laatotoo waybe mum.» ³⁷ «Jidudo baaba mum, dum bo inna mum faa burinimmi, joomum fotay laataago mo am. Jidudo biddo mum gorko naa bo debbo, faa burinimmi, joomum fotay laataago mo am. ³⁸ Mo ettay leggal mum palaanjal tokkimmii, joomum fotay laataago mo am. ³⁹ Jidudo hisina yonki mum, dullan ki, amma majjindo yonki mum gam am, hebitinto ki.»

*Haala riiba
(Marku 9.41; Luka 10.16)*

⁴⁰ «Jaabbiido on fu, jaabike am, jaabbiido am bo jaabike liloydo am. ⁴¹ Jaabbiido annabijjo gam oo annabijjo, joomum heban riiba ka annabijibe hebata. Jaabbiido neddo poonntiido gam oo poonntiido, joomum heban riiba ka foonnitiibe hebata. ⁴² E goonja batanmi on, kokkudo burdo faandugo caka aahiiibe am, diyam peewdam, baa der jarigel gootel, gam oo aahijjo am, o dullataa riiba makko.»

11

*Yuhaana lili aahiiibe mum to Yeesu
(Luka 7.18-35)*

¹ No Yeesu heennyi waajaago aahiiibe mum sappo e dido waajuuji dii, o yawti diga don. Den o yahi janninoygo e waajaago caka ci'e mawde, der weoccoore nen.

² Yuhaana gadoowo batisi e wonnoo der kasu, go o nani golle de Almasiihu wadata e batane. Den o lili aahiiibe makko, ³ yaha yamaa Yeesu, wi'a: «An woni kaanudo wara na, naa men kedoo goddo?»

⁴ Yeesu toontii 6e, wi'i: «Jahee, batee Yuhaana ko nanudon e ko ji'udon fu: ⁵ wumuþe e wunta, moofidinþe e yaha, sessebbé e nyawtee, pahidinþe e nana, maayþe e finta, talakaabé bo e waajee habaru Laamaare Alla. ⁶ Barke laatanto mo mi laatanaaki daliila fergere dow goondinki mum.»

⁷ No lilaabé ðen yawti, Yeesu fuddi batugo jama'aare haala Yuhaana, o wi'i: «Ume jahudon daaroygo der haro? Kudool ñol hennu dimmata na? ⁸ Naa ume daaroydon? Gorko borniido gineesi boodudi na? Borniibé gineesi boodudi, der wuro laamiibé nun tawetee. ⁹ Den, ume jahudon daaroygo? Annabiijo na? Oo! Mii bata on, oo ðuri annabiijo. ¹⁰ Kanko nun Dewte batani wi'i: "Mi lilan lilaado am yeeso maada, o moyyananee laawol."» ¹¹ «E goonja batanmi on, der 6e rewþe rimi fu, walaa burdo Yuhaana gadoowo batisi manju. Amma, burdo pettidingo der Laamaare Alla, e ðuri Yuhaana manju.» ¹² Diga Yuhaana gadoowo batisi fuddi waajaago faa jooni, himþe e teetontira Laamaare Alla e catte. Sattuse bo teetata ne. ¹³ Annabiibé, e dewte tawreeta fu, wadii annabaaku dow Laamaare nen faa yottii wakkati Yuhaana gadoowo batisi. ¹⁴ To oon jidi koolee, Yuhaana woni annabi Eliya, kaanudo wara. ¹⁵ Goodudo noppi fu, nana.

¹⁶ Ume nun nanditiranmi himþe jaamanuuru nuu do? Bee nandi e sukaabé joodiibé caka jayri to himþe fijata, e huuba igoobe mum, e wi'a: ¹⁷ "Men puuranii on puuraadi, on pijay, men jimanii on jimi bojji maayde, on cimaaki." ¹⁸ Gam no Yuhaana wari, o nyaamataa o yarataa, on bi'ii: "O ginnaajijo nun." ¹⁹ Bii neddo warii, e nyaama,

e yara. Den, himbe wi'i: "O laati nun deereeruujo, e jaroowo bagi. Oo laatii bo beldiijo jauboobe ceede faada, e wadoobe hakke hande mabbe." Amma, hakkillo Alla e hollitoo der golle muudum.»

*Yeesu felii genneele caliide ko tuubi
(Luka 10.13-16)*

²⁰ Baawo majjum, Yeesu feli genneele de o wadi haaynaareeji duuddi der mum ko himbe majje tuubay. O wi'i: ²¹ «Bone laatante, an Korajin! Bone laatante, an Baytisayda! Gam haaynaareeji gadaadi to moodon, to di gadaanomaa der Tirus e Sidon, maa be mootikeno dooni, be bornii saakiho, be kollitira no be tuubii. ²² Gam majjum, mii wi'a on: Nyalaane darnjal, kiita Tirus e Sidon hoyan e ka moodon. ²³ An bo Kafarnahum, aa miili a towinte faa dow kammu na? Aawo! A leesinte faa der joonne maaybe. Gam haaynaareeji gadaadi der maa, to di gadaanomaa der Sodoma, maa siire nen na'onno faa hanne. ²⁴ Gam majjum, mii wi'a on: Nyalaane darnjal, kiita Sodoma hoyan e ka moodon.»

*Yeesu e nodda himbe gam siwtaare
Luka 10.21-22*

²⁵ Wakkati mum, Yeesu etti haala wi'i: «Mii yettee Baaba, Joomiraawo mo dow, e mo leydi. A suudii woodube annal e hakkillo kujje dee, ko kollitindaa de sukahon petton. ²⁶ E goonja, mi yettie maa Baaba, gam non dum fottiran maa. ²⁷ Baaba am hokkii am huune fu der junjo am. Walaa annudo Biddo to hinaa Baaba. Walaa annudo Baaba bo, to hinaa Biddo, e mo Biddo yidi holitingo dum.»

28 «Garee to am on fu, onon somube, e rooniibe doolle tedduufe, mi hokkan on siwtaare.
29 Dowtanee am, accee mi janjina on. Gam mii yeeddi, mii diggi, den yonkiji mon heban siwtaare.
30 Gam doongal am e huyfi, ko dooninanmi on bo teddaa.»

12

*Yande dow nyalaane siwteteene
 (Marku 2.23-28, 3.1-6; Luka 6.1-5)*

1 Wakkati mum, Yeesu e aahiibe mum e falta caka gese alkamaari nyalaane siwteteene, go aahiibe makko rafo wadi dum, yanti e wooca cammeeje e yakka. **2** No Farisaabe yi'i dum, wi'i mo: «Daaru, aahiibe maa e wada ko haanay Wadeego nyalaane siwteteene!» **3** O toontii 6e, o wi'i: «E goonja on janjay ko Dawda wadi no rafo wadi dum, e himbe mum na? **4** O naati der suudu Alla, e himbe makko, 6e yakki peen cakkanaako Alla. Baa no kanko e himbe makko 6e goodaa laawol yakkugo ko. Limaamiibe tan nun woodi laawol yakkugo ko. **5** Naa, on janjay der tawreeta Muusa, no limaamiibe gollotoobe der suudu Alla wadiri ko haanaa der nyalaane siwteteene? Amma e nun fu 6e gaccaaka. **6** Mii wi'a on e goonja, burdo suudu Alla mawnugo nun woni do. **7** To on paamiino ko haala Alla kaa do fillitii: "Yurmeeene jidumi, hinaa sadakaaji kiisetedi", on kiitataakono himbe 6e walaa gacce.» **8** Gam Bii neddo nun latii Joomiraawo nyalaane siwteteene.»

*Yeesu nyawtii gorko mo junjo waatujo
 (Marku 3.1-6; Luka 6.6-11)*

⁹ Yeesu yawti diga don, yahi der suudu waajorde maabbe. ¹⁰ Gorko mo junjo waatujo gom e tawaa don, go tawaabe don yami mo yande dee do, gam heba no gaccorii mo, wi'i: «Laawol hokkii nyawtiigu waddee nyalaane siwteteene na?» ¹¹ O toontii be, o wi'i: «To goddo moodon e woodi baalel mum, go nyalaane siwteteene nel yanti der bunnu, joomum suttoytaa nel na? ¹² Neddo e buri baala faa to woddi! To non, laawol hokki ko woodi waddee der nyalaane siwteteene.» ¹³ Den, o wi'i gorko on: «Foortu junjo maa!»

O foorti no, no yoofii hande no noo to. ¹⁴ Farisaabe wurtii, yahi dawraa dow no be kalkirta Yeesu.

Annabaaku Esaaya hebbii

¹⁵ No Yeesu nani ka, yawti diga nokkuure nen, himbe duubbe e tokki mo. O nyawti nyawbe fu.

¹⁶ Den o waggini be, to be batu goddo moy nun o laatii. ¹⁷ Dum laatike non gam haala annabi Esaaya hebbi, ka o wi'i:

¹⁸ «Nani gollotoodo am mo cubumi.

Kanko woni jidaado am, mo ceyoriumi.

Mi jippinan Ruuhu am dow makko,

o finan habaru foonnitaare dow lenyi fu.

¹⁹ O yeddontirtaa e goddo, o falmataa goddo, daane makko nanataake e laabi.

²⁰ O heltataa yommal turijal, o nyifataa fitilleel cuurtoowel,

faa nyalaane o hokki foonnitaare jaalorgal.

²¹ Lenyi fu yowan hoolaare mum dow makko.»

Yeesu e toontoo ka be gaccorii dum

(Marku 3.19-30; Luka 11.14-23)

22 Den, Yeesu waddanaa gorko bumdo muumidindo, mo ginnool woni e mum. O nyawti mo faa muumo on e bata, e yi'a bo. **23** Haynaare nannji himbe fu, ko bee bi'a: «Hinaa kanko woni Bii Dawda na?»

24 Amma no Farisaabe nani ka, yanti e wi'a: «E baawde "Beljebul" hooreejo ginnaaji nun o riiwirta di.» **25** No Yeesu e anni miilooji mabbe, o wi'i 6e: «Laamaare fu to seennirake e haba hoore mum, ne halkan. Dum bo to siire gom, maa bo wuro gom seennirii e haba hoore mum, jo wonataako. **26** To Seydan seennirake e riiwa Seydan, den noy laamaare makko wonortoo? **27** To laatike e baawde "Beljebul" nun diiwiranmi ginnaaji, 6ibbe moodon bo na, e baawde moy be diiwirta di? Gam majjum, kambe e ko'e mabbe nun laatoytuu hiitotoobe on! **28** Amma to e Ruuhu Alla nun diiwiranmi ginnaaji, edum holla no Laamaare Alla warii faa to moodon.

29 Naa moy waawata ko naati wuro gorko semmenteejo, teeta jawdi makko, to o habbay joomum taw. Amma to o habbii mo, o waawan ko wuuwi ko woni der wuro 7on fu. **30** Mo wonday e am fu, ganyo am nun. Mo wallay am hawritingo, sankitan nun. **31** Gam majjum, mii wi'a on: himbe heban yaafuye hakkeeji mum, e kalluka ka be bati. Amma batudo kalluka dow Ruuhu Ceniido, yaafataake pay. **32** Batudo kalluka dow Bii neddo fu, heban yaafeego. Amma batudo kalluka dow Ruuhu Ceniido, yaafataake der jaamanuuru nuu do, e der jaamanuuru warannu.»

*Leggal annitirte nun diga e 6ibbe mum
(Luka 6.43-45)*

³³ «To leggal e woodi, bïbïe maggal bo woodan. To leggal woodaa, bïbïe maggal bo woodataa, gam leggal fu, diga e bïbïe mum nun annitritee. ³⁴ Bïbïe bolle pure! Noy baawirton batugo booduka, onon laatiïbe hallube? Gam ko hebbi der berne, kan nun hunnuko wurtinta. ³⁵ Neddo geeto, wurtinan ko woodi diga boodsum ko suudii der berne mum. Neddo kalludo bo, wurtinan ko halli diga kalludum cuudiidum der berne mum. ³⁶ E goonja bi'anmi on: nyalaane darnjal himbe toontoyo haalaaji baanji baanji di be batu fu. ³⁷ Gam moy fu, haala mum nun wurtinta dum, dum bo ka doyya dum kiita.»

*Farisaabe e daarta Yeesu wadana dum kaayeefi
(Luka 11.29-32)*

³⁸ Baawo majjum, wobbe der moodibbe tawreeta e Farisaabe, wi'i Yeesu: «Moodibbo, emen jidi gadanaa men kaayeefi.»

³⁹ O toontii be, o wi'i: «Himbe jaamanuuru hallunu, cobube, e daarta kaayeefi. Be ji'ataa kaayeefi gom, to hinaa kaayeefi annabi Yonas. ⁴⁰ Yonas wadii nyaloomaaje tati e jemmaaje tati der reedu linnol manjol. Hande non bo Bii neddo wadirta nyaloomaaje tati e jemmaaje tati der leydi. ⁴¹ Nyalaane darnjal, himbe Niniwe ummodoto e himbe jaamanuuru nuu do, gaccoo be. Gam be tuubii no be nani waaji Yonas. Nani bo, burudo Yonas nun woni do! ⁴² Nyalaane darnjal, laamiido debbo mo leydi hoore fudo ummodoto e himbe jaamanuuru nuu do, gaccoo be. Gam o yiwoy diga

kaddin leydi, o wari hettinaago haalaaji Suleymaanu kebbudi hakkillo. Nani bo, ɓurudo Suleymaanu nun woni do!»

*Wittoygo ginnool der wuro mum hiinjø
(Luka 11.24-26)*

⁴³ «To ginnool wurtike e neddo, ɣol yahan ɣol yiilitoo nokkuuje joorde, ɣol daarta to ɣol siwtoto, amma ɣol hebataa. ⁴⁴ Den ɣol wi'an: "Mi wittitinto wuro am ɣo eggunoomi e mum." To ɣol yottike, ɣol tawan goddo walaa der wuro ɣon, ɣo wuuwaa, ɣo moyyinaa faa woodi. ⁴⁵ Den, ɣol wittan, ɣol waddaa ginnaaji jeedidi goddi ɓurudi ɣol hallugo. Di naata e wuro ɣon, di joodoo der maggo. Heennyitirde neddo on buran arandeere mum hallugo. Hande non sum laatantoo himbe jaamanuuru hallunu nu.»

*Miiraabe Yeesu e inniiko
(Marku 3.31-35; Luka 8.19-21)*

⁴⁶ Wakkati Yeesu baddata e jama'aare, inniiko e miiraabe makko yottii. Be darii yaasi, bee jidi baddugo mo. ⁴⁷ Den, goddo bati Yeesu, wi'i: «Inna maa e miiraabe maa e darii yaasi, e yidi baddugo maa.» ⁴⁸ O toontii mo, o wi'i: «Moy woni inna am? Bey woni miiraabe am?» ⁴⁹ O sappii aahiiþe makko, o wi'i: «Inna am e miiraabe am nun do. ⁵⁰ Miiraabe am worþe e rewþe, e inna am woni, wadooþe ko Baaba am gonudo dow kammu yidi.»

13

*Balloon aawoowo
(Marku 4.1-9; Luka 8.4-8)*

¹ Nyaanne mum, Yeesu wurtii wuro, yahi joodoy takkol maayo. ² Jama'aare duunne e howii mo, o ummii o naati laana diyam, o joodii. Himbe fu e darii takkol maayo. ³ O bati 6e kujje duuddde e ballaaji. O wi'i 6e: «Aawoowo nun wurtii aawoogo. ⁴ No o aawata, awdiiri gонни yani sera laawol, pooli wari soppi ni. ⁵ Gonni bo yani e kaaye to leydi duudaa, ni fudi don maa don, gam ni hebay to leydi luggi. ⁶ Amma no naanje nyawli, ше wuli ni. Ni yoori, gam ni walaa dadi. ⁷ Gonni bo yani caka gi'e. Gi'e mawni, бидди ni. ⁸ Gonni bo yani e leydi geeri, ni fudi, ni rimi бikkol: Gonni rimi gite hewre, gонни lasoy tati, gонни bo laso e sappo. ⁹ Goodudo noppi fu nana!»

*Ko acci Yeesu e badda himbe e ballaaji
(Marku 4.10-12; Luka 8.9-10)*

¹⁰ Aahиibe Yeesu бattii, yami mo, wi'i: «Ume wadi ko aa baddira himbe e ballaaji?» ¹¹ O toontii 6e, o wi'i: «Onon, on kokkaama faamugo asiiri Laamaare Alla, amma kambe, 6e kebay dum. ¹² Gam goodudo nun бeydantee faa duuda. Anni mo woodaa, baa sedsa ko woodi, teetete. ¹³ Gam мажум, baddiranmi 6e e ballaaji: "Gam 6ee daara, amma 6e ji'ataa, Bee kettinoo, amma 6e nanataa, 6e paamataa bo." ¹⁴ Hande non ka Alla batunoo e hunnuko annabi Esaaya hebbiri dow мabbe: "On nanan faa wooda, amma on paamataa fuy, on daaran faa wooda, amma on ji'ataa fuy.
¹⁵ Gam himbe lenyol шol 6erde mum laatike joorde. Be cukkii noppi мabbe, 6e muunnii gite мabbe, gam to 6e ji'u

to 6e nanu e noppi ma66e,
hakkillo ma66e bo to faamu,
hakko 6e tuuba, mi nyawta 6e.”

16 Amma onon, barke laatanike on, gam gite moodon e yi'a, noppi moodon bo e nana! **17** E goonja batanmi on, annabiibe duubbe, e foonnitiibe duubbe yidiino yi'a ko ji'oton, amma 6e ji'ay. Be jidiino 6e nana ko nanoton, amma 6e nanay.»

*Yeesu e faamina ballool aawoowo
(Marku 4.13-20; Luka 8.11-15)*

18 «Onon, kettinee ko ballool aawoowo ŋol fillitii.
19 To neddo e hettinoo haala Laamaare Alla, go o faamataa ka, Kalludo nun puttata ka der 6erne makko. Kanko nandi e awdiiri caamuni sera laawol. **20** Goddo e nandi e awdiiri caamuni to kaaye. Kanko to o nanii haala Alla, don maa don o ja6a ka e seyo. **21** Amma ka wadataa dadí der makko, wakkati sedda tan o wonoto. To billaaje, dum bo tooraaji yottake gam haala kan, o woppa ka law. **22** Goddo e nandi e awdiiri caamuni to gi'e woni. To o nanii haala Alla, billaaje duuniyaaru e yidde jawdi bidda ka, ka rimataa bikkol. **23** Amma goddo e nandi e awdiiri caamuni to leydi geeri. To o nanii haala Alla, o faama ka. Kanko o riman bikkon. Gokkon hewre, gokkon lasoy tati, gokkon bo laso e sappo.»

Fudo kalluko der gesa alkamaari

24 Yeesu wadani 6e kade ballool gonjol, wi'i:
«Laamaare Alla e nandi e gorko aawudo awdiiri geeri e gesa mum. **25** No him6e fu daani, don ganyo makko wari, aawi fudo kalluko caka alkamaari nin, yawti. **26** No alkamaari fudi e sawtina, den

fudo kalluko bo suppitii. ²⁷ Gollotooþe jom gesa wari, wi'i mo: "Joomiraawo, awdiiri geeri bane aawudaa der gesa maa na? Diga toy fudo kalluko koo do yiwi?" ²⁸ O toontii 6e, o wi'i: "Ganyo nun wadi dum.» Den, gollotooþe 6en yami mo, wi'i: «Men jaha men doofaa fudo kalluko kon na?" ²⁹ O toontii 6e, o wi'i: "Aawo, gam to oon doofa fudo kalluko, on kawran e alkamaari. ³⁰ Accee dum mawnida faa wakkati dugge yottoo. To wakkati dugge yottake, mi wi'an ruggooþe am doofa fudo kalluko kon taw, haþþa ko, watta der yiite. Amma alkamaari, 6e kawrita dum der beemal am."»

*Ballool 6injel mutaadihi
(Marku 4.30-32; Luka 13.18-21)*

³¹ Yeesu wadani 6e ballool gonnol, wi'i: «Laa-maare Alla e nandi e 6injel mutaadihi, ñel godðo etti aawi der gesa mum. ³² Binjel mutaadihi buri 6ikkol ledde kara li'o fu faandugo. Amma to ñel fudi, enjel bura ledde kara li'o mawnugo, ñel laatoo leggal manjal faa pooli wada dadda mum dow licce maggall.»

*Balloolyuufinirdum
(Luka 13.20-21)*

³³ O wadani 6e ballool gonnol, o wi'i: «Laa-maare Alla e nandi e yuufinirdum, dum debbo etti hawrontiri e conni etorde tati, ko ni yuufini conni laawaani nin fu.»

*Ko acci Yeesu e bata e ballaaji
(Marku 4.33-34)*

³⁴ E ballaaji nun Yeesu baddiri himþe huune dum fu. O badday 6e to hinaa e ballaaji. ³⁵ O wadii

dum gam hebbingo haala ka annabiijo batunoo,
wi'i:
«Mi mabbitan hunnuko,
mi bata e ballaaji,
mi batan, mi wurtina kuppe cuudinoode
diga ko duuniyaaru tagaa.»

Yeesu faantinii ballool fudo kalluko

³⁶ Baawo majjum, Yeesu acci himbe, hooti wuro. Aahiibe makko battii, yami mo, wi'i: «Faantin men ballool fudo kalluko der gesa.» ³⁷ O toontii be, o wi'i: «Aawudo aawdi booduni woni Bii neddo. ³⁸ Gesa jan woni duuniyaaru. Awdiiri geeri woni fotube naata der Laamaare Alla, fudo kalluko woni, tokkubee Kalludo. ³⁹ Ganyo aawudo fudo kalluko woni Ibiliisa, dugge laati nun nyalaane darnjal, ruggoobe bo laatii malaykaabe. ⁴⁰ Hande no fudo kalluko doofirtee wattee e yiite, hande non dum laatotoo nyalaane darnjal. ⁴¹ Bii neddo lilan malaykaabe mum, wurtina doyyoobe himbe der hakke, e wadoobe ko halli der laamaare mum. ⁴² O faddan be der yiite jahannama, ton be bullata, be yakkontira nyiiye. ⁴³ Amma wakkati mum, foontiibe jalbitinto hande naanje der Laamaare Baaba mum. Goodudo noppo fu, nana!»

Ballool jawdi cuudiini

⁴⁴ «Laamaare Alla e nandi e jawdi cuudiini der gesa. Goddo hocciri ni, witti suuditii ni. Berne makko weli puy, den o yahi o sippoy ko o woodi fu, gam o sooda gesa jan.»

⁴⁵ «Faa hanne Laamaare Alla e nandi e tenkootodo daartoowo sokiyaaje dime. ⁴⁶ No o yi'i sokiyaaje dime, o sippoy ko o woodi fu, o soodi de.»

Ballool taaruwol

⁴⁷ «Laamaare Alla e nandi kade e taaruwol paddaanjol der maayo, nannoy liyyi feere feereeji.
⁴⁸ No ɳol hebbi, suubotoobe foodi ɳol, wurtini far fonjo, be joodii 6e cubitii di. Be gatti liyyi booddii der killaaje, be boppi di nafataa godsum. ⁴⁹ Hande non dum laatotoo nyaanne duuniyaaru timmata. Malaykaabe waran suttontira hallube e woodube.
⁵⁰ Be paddan hallube der yiite manje, be bulla, be yakkontira nyiye.»

Ballool kujje kese e kiidde

⁵¹ Yeesu yami 6e, wi'i: «On paamii huune dum fu na?» Be toontii, 6e bi'i: «Oo, men paamii.»
⁵² Den, o wi'i 6e: «Moodibbo tawreeta paamudo haala Laamaare Alla, e nandi hande jom wuro, burtinoowo huune kesum e kiiddum diga e jawdi mum.»

Be Nasaratu salike ko goondini Yeesu

(Marku 6.1-6; Luka 4.16-30)

⁵³ No Yeesu heennyi batugo e ballaaji, o yawti diga don. ⁵⁴ O witti genni makko to o mawni, oo waajoo der cuudi mabbe baajordi. Ko haaynaare nannji himbe hettinaniibe mo, bee bi'a: «Toy o hebi annal iri ɳal do, e baawde wadugo kaayefiji dii do? ⁵⁵ E goonja, kanko bane woni 6ii cebooowo ledse on na? Inniiko bane wi'etee Mariyama na? Miraabe makko bane Yaakuuba, e Yusufu, e Simon, e Yahuuda na? ⁵⁶ Enen e sakikiraabe makko rewbe bane wondi do na? Den, toy o hebi dum don fu?»

⁵⁷ Dum hadi 6e goondingo mo. Gam majjum, o wi'i 6e: «Annabijjo teddintaake der genni mum, e der wuro mum.» ⁵⁸ O waday don haaynaareeji duuddi gam 6e goondinay mo.

14

*Maayde Yuhaana gadoowo batisi
(Marku 6.14-29; Luka 3.19-20, 9.7-9)*

¹ Wakkati majjum, Eroodu hooreejo leydi Galili nani Yeesu e batanee. ² O wi'i jaggiibe makko: «Yuhaana gadoowo batisi nun! O fintii. Kanjum acci oo woodi baawde wadugo kaayeefiji.»

³ Tawi Eroodu hokkiino laawol Yuhaana nanjee, habbee, wattee der kasu. O wadii dum sabbu Erodiya, debbo mawniiko, Filippu. ⁴ Gam Yuhaana wi'iino Eroodu: «Laawol hokkay maa koowaa mo.» ⁵ Eroodu e yiduno warugo mo, amma oo hula himbe, gam himbe fu e goondini no Yuhaana laati nun annabijjo.

⁶ No nyalaane juulde dingol Eroodu yottii, bii Erodiya debbo naati e fija yeeso noddinaabe. Dum weli Eroodu puy. ⁷ O hunanii suka on, o hokkan dum huune ko yami fu. ⁸ Suka debbo on gollori ka inna mum tintini dum, wi'i Eroodu: «Wattanam do hoore Yuhaana gadoowo batisi der heedo!»

⁹ Berne Eroodu biisi, amma, gam sabbu o huneiye yeeso noddinaabe makko, o hokki hunnuko ne hokkee suka debbo on. ¹⁰ O lili goddo yaha wudditaa hoore Yuhaana der kasu. ¹¹ Hoore nen waddaa der heedo, suka debbo on hokkaa. Kanko bo, o hokkoy inniiko. ¹² Aahiiibe Yuhaana wari etti 6annu makko, uwoy. Baawo majjum, 6e jahi 6e batoy Yeesu ko wadi.

*Yeesu nyaannii himbe ujune joyo
(Marku 6.30-44; Luka 9.10-17; Yuhaana 6.1-14)*

¹³ No Yeesu nani habaru on, o solti kanko tan, o naati laana, o yahi nokkuure deyyune. Himbe

nani ka, wurtoy diga ci'e mum, tokki mo e koyde.
14 No o wurti e laana, o yi'i jama'aare duunne, yurmeene mabbe wadi mo, den o nyawti nyawbe tawaabe don.

15 No kiikiide wadi, aahiiþe makko bættii mo, wi'i: «Kiikiide wadii, kade bo, e ladde nun gonuden do. Accu himþe þen yawta, yaha der ci'e, soodaa ko nyaamata.» **16** Yeesu toontii 6e, wi'i: «Doole bane 6e jawta. Onon e ko'e moodon, kokkee 6e ko 6e nyaamata!» **17** Be toontii mo, 6e bi'i: «Peen joyo, e liyyi didi tan gooduden do.» **18** O wi'i 6e: «Gaddanee am ðum do.»

19 O hokki hunnuko himþe joodinee dow fudo. Den o etti peen joyo kon, e liyyi didi din, o tiggiti, o yetti Alla. O ñappiti peen kon, o hokki aahiiþe makko seennana jama'aare. **20** Be fu 6e nyaami 6e kaari. Aahiiþe hawriti ko horii, ðum hebbi killaaje sappo e didi. **21** Nyaamuþe ðum wadii worþe ujune joyo, rewbe e sukaabe limaaka.

*Yeesu yahii dow diyam
(Marku 6.45-52)*

22 Don maa don, Yeesu dooli aahiiþe mum naata laana, ardoo, jola fonþo maayo. Wakkati mum, oo waynoo jama'aare. **23** Baawo no o waynodii 6e, o yawtiri dow waanne gam o wadaa du'aare kanko tan. Foti kiikiide wadii, kanko tan bo woni ton. **24** Tawi laana ñan woddfake diga e fonþo, ko galmaaji diyam e fiya ña, gam ña jaþbitinto nun hennu. **25** No faanii weetugo, Yeesu yottii to mabbe, e yaha dow maayo e koyde. **26** No aahiiþe makko yi'i mo oo yaha dow diyam e koyde, kulol manþol nannji 6e, 6e bi'i: «Beelu nun!» Be darii 6ee

kalba sabbu kulol. ²⁷ Don maa don Yeesu wi'i 6e: «Deyyitee! Min nun, to on kulee!»

²⁸ Piyer toontii mo, wi'i: «Joomiraawo, to an nun e goonja, accu mi yaha dow diyam, mi wara to maa.»

²⁹ O toontii mo, o wi'i: «War!» Piyer wurtii laana, e yaha dow diyam, e foonnii to Yeesu. ³⁰ Amma no o yi'i hennu e satti, o huli, o fuddi mutugo, den o halbi, o wi'i: «Joomiraawo, faabam!» ³¹ Don maa don, Yeesu foorti junjo mum, jogii mo, wi'i: «An mo goondinki paanduki, gam ume ko gadufaa seko?» ³² Be fu dido, be naati laana, den, hennu darii. ³³ Tawaabe der laana jan fu, sujidani Yeesu, wi'i: «E goonja, a laati nun Biddo Alla!»

*Yeesu nyawtii nyawbe der leydi Genesaret
(Marku 6.53-56)*

³⁴ Baawo no 6e joli maayo, 6e jottii leydi Genesaret. ³⁵ Himbe tawaabe nokkuure nen anniti mo. Be lildi habaru der leydi nin fu, no o wari, 6e gad-dani mo nyawbe fu. ³⁶ Bee eela mo o acca nyawbe 6en meema baa kommulol togoore makko tan. Hande non bo, meemube 6ol fu e yoofoo.

15

*Tawaanjal kaakiraabe
(Marku 7.1-13)*

¹ Farisaabe e moodibbe tawreeta yiwoy Urusaliima, wari to Yeesu, yami mo, wi'i: ² «Ume wadi ko aahiibe maa e waylita tawaanjal kaakiraabe meeden? Gam 6e lootataa juude maabbe go 6e nyaama.»

³ O toontii 6e, o wi'i: «Onon bo na, ume wadi go oon baylita sariyaaji Alla no fottiranta tawaanjal moodon? ⁴ Gam Alla wi'i: "Teddin baaba maa e

inna maa.” O wi'i kade: “Jennudo baaba mum, dum bo inna mum, joomum e haani waree.”

⁵ Amma onon, oon bi'a, to neddo wi'ii baaba mum, dum bo inna mum: “Ko haani mi wallitiree laatike gedu Alla, den doole bane ballitaa baaba maa e inna maa.” ⁶ Nun nun baylitirdon haala Alla gam tawaanjal moodon. ⁷ Onon munaafitiibe! Esaaya wadii annabaaku dow moodon, wi'i:

⁸ “Lenyol ηol do, e hunnuko tan nun teddinirtammi,

amma berde maabbe e woddodii am.

⁹ Bee cujidanammi, amma dum nafataa

gam ko 6e janjinta laati nun miilooji himbe.”»

*Ko sobinta neddo
(Marku 7.14-23)*

¹⁰ Den, Yeesu noddi jama'aare, wi'i 6e: «Kettinee, paamee faa wooda: ¹¹ Ko naatata der hunnuko neddo bane sobinta mo. Amma ko wurtoto diga e hunnuko makko, kanjum sobinta mo.»

¹² Go aahii6e makko 6attii, wi'i mo: «Aa anni haala maada kan mettinii berde Farisaabe na?»

¹³ O toontii 6e, o wi'i: «Aawre fu ne Baaba am gonudo dow kammu aaway, ne doofete. ¹⁴ Accee 6e, wumu6e ardiibe wumu6e nun! To bumdo e ardi bumdo bannum, 6e fu dido, 6e jantan der gayka.»

¹⁵ Piyer toontii mo wi'i: «Faamin men haala kan.»

¹⁶ Yeesu wi'i mo: «Onon bo, faa jooni on galaa faamu na? ¹⁷ On paamay huune ko naati e hunnuko fu, der reedu dum pa'i, den dum wurtoo na? ¹⁸ Amma ko wurtoto e hunnuko fu, der berne dum yiwata, kanjum nun sobinta neddo. ¹⁹ Gam diga der berne neddo nun miilooji kalludi yiwata. Den di

gatta mo barol himbe, jeenu, kaaruwaaku, guyka, seedaago fewre, e batugo kalluka. ²⁰ Dum don nun woni ko sobinta neddo. Amma nyaamugo lootay juude mum hande no tawaanjal holliri sobintaa neddo.»

*Debbo Kananinkeejo goondinii Yeesu
Marku 7.24-30*

²¹ Baawo majjum, Yeesu yawti diga don yahi der jeyde Tirus e Sidon. ²² Debbo Kananinkeejo, jeyaado der leydi nin wari to makko, bati e daane towne, wi'i: «Joomiraawo, Bii Dawda, yurmam! Ginnool nun toorata biyam debbo sanne!» ²³ Amma o toontaaki mo gokka. Ko aahiibe makko wi'i mo: «Riiwu mo, gam o accay halbugo, oo tokkiri en.» ²⁴ Yeesu toontii be, wi'i: «Mi lilaaka maa to baali Isira'iila majjuditan.» ²⁵ Amma debbo on wari jicci yeeso makko, wi'i: «Joomiraawo, war wallam!» ²⁶ Yeesu toontii mo, wi'i: «Dum woodaa nyaamdu sukaabe ettee, faddanee dawaadi.» ²⁷ Debbo on wi'i: «Goonja nun Joomiraawo, amma dawaadi bo e subinoo nyaamdu caamoowol to joomiraabe mum nyaamata.» ²⁸ Den, Yeesu toontii mo, wi'i: «Hey debbo, goondinki maa e mawni! Dum laatanee hande no jidirdaa.» E wakkati on, biyiiko yoofii.

*Yeesu nyawtii nyawbe duubbe
(Marku 7.31-37)*

²⁹ Yeesu yawti diga don, witti takkol maayo Galili, eenci dow waanne, joodii ton. ³⁰ Himbe duubbe wari to makko, be gaddani mo layoobe, e wumuube, e moofidinbe, e muumidinbe, e nyawbe nyawuuji feere feere. Be desi be ley koyde Yeesu.

31 Haynaare nannji himbe, no be ji'i muumidinbe e bata, moofidinbe e yoofoo, layoobe e yaha deydey, wumube bo e yi'a. Be teddini Alla mo Isira'iila.

*Yeesu nyaannii kade worbe ujune nayo
(Marku 8.1-10; Matiye 14.13-21)*

32 Yeesu noddi aahiiibe mum, wi'i: «Himbe bee e yurminoo am. Gam wadii balde tati bee gondi e am, be goodaa ko be nyaamata. Mi yidaa bo riiwugo be be jawta e rafo, gam to rafo doyyu be e laawol.» **33** Aahiiibe makko wi'i mo: «Toy kebeten nyaamdu ko nyaannata jama'aare nee do e ladde haro do?» **34** O yami be, o wi'i: «Peen noyo gooduson?» Be toontii mo, be bi'i: «Peen jeedido e likkol pettol sedda.»

35 Baawo majjum, o hokki hunnuko jama'aare joodox e leydi. **36** O etti peen jeedido, e likkon sedda kon. O yetti Alla, o nappiti, o hokki aahiiibe makko, be ceennani jama'aare. **37** Be fu be nyaami faa be kaari. Be kawriti ko horii, hebbi killaaje jeedidi. **38** Nyaamu be dsum wadii worbe ujune nayo, rewbe e sukaabe limaaka. **39** Baawo mum Yeesu waynii be. Den, o naati laana, o yahi leydi Magadan.

16

*Farisaabe yamii Yeesu wadana dum kayniidum
(Marku 8.11-13; Luka 12.54-56)*

1 Farisaabe e Sadukiibe war ijarbaago Yeesu. Be yami mo o wadana be kayniidum yiwudum diga kammu. **2** O toontii be, o wi'i: «[To on ji'ii dow kammu e wojji kiikiide, oon bi'a: "Nokkuuje woodan." **3** Subaka bo, to on ji'ii kammu e wojji e

niibbi, oon bi'a: "Diyam tobān." Oon anni sutton-tirgo ko wadotoo dow kammu, amma on baaway suttontirgo maane wakkatiire nee do!] ⁴ Himbe jaamanuuru hallunu, cobube, e daarta kaayeefi. Be ji'ataa kaayeefi gom, to hinaa kaayeefi Yonas.»

Baawo majjum, o acci be, o yawti.

*Hakkilango munaafitaare Farisaabe e Sadukiibe
(Marku 8.14-21)*

⁵ No aahiibe jolata fonjo maayo far to, be jeggiti ko etti peen. ⁶ Yeesu wi'i be: «Kakkilee, deenee ko'e mon e yuufinirdum Farisaabe e dum Sadukiibe.» ⁷ Aahiibe darii e wi'ontira hakkune mum: «Gam en ettay peen acci oo bata ka.»

⁸ Yeesu anniti ka be batata, wi'i be: «Ko wadi oon badda hakkune mon, oon batana dullere moodon jogaago peen? Onon be goondinki paanduki! ⁹ E goonja faa jooni on paamay na? On ciwtoray peen joyo ko ceennanmi worbe ujune joyo, e killaaje de kebbindon ko horii na? ¹⁰ On ciwtoray bo peen jeedido ko ceennanmi worbe ujune nayo, e killaaje de kebbindon ko horii na? ¹¹ Noy wadi go on paamay no haala peen bane batananmi, wakkati bi'umi on, kakkilanee yuufinirdum Farisaabe e dum Sadukiibe?»

¹² Den, be paami no yuufinirdum conni peen bane o batanta, amma, ekkitinol Farisaabe e njol Sadukiibe.

*Piyer batii Yeesu nun woni Almasiihu
(Marku 8.27-30; Luka 9.18-21)*

¹³ Yeesu yahii leydi Kaysariya Filippu. O yami aahiibe makko, o wi'i: «Moy himbe wi'ata Bii neddo e laatii?» ¹⁴ Be toontii mo, be bi'i: «Wobbe e wi'a,

a laati nun Yuhaana gadoowo batisi. Woobbe e wi'a, an woni annabi Eliya. Woobbe kade e wi'a, an woni annabi Yeremiya, to dum bo gooto der annabiiße.» ¹⁵ Yeesu yami 6e, onon bo na: «Moy bi'oton mii laatii?» ¹⁶ Simon Piyer toontii mo, wi'i: «An woni Almasiihu, Biddo Alla yonkinteejo.» ¹⁷ Den Yeesu ettitii haala wi'i mo: «Barke laatanii maa, an Simon 6ii Yonas. Gam neddo bane hollitin maa dum, amma Baaba am gonudo dow kammu hollitin maa dum. ¹⁸ Min bo, mii wi'ee, an woni Piyer, waato hayre. Dow hayre nen mahanmi Eklesiya am, baa joonne maaybe waawataa ko jaalii ka. ¹⁹ Mi hokkete mabbitirgel Laamaare Alla. Ko calidaa e leydi do, salaama dow kammu. Ko jaabudaa e leydi do bo, jabaama dow kammu.» ²⁰ Den, Yeesu wagginia aahiiße mum, e semme, wi'i to 6e batu goddo, no kanko nun woni Almasiihu.

*Yeesu batanii maayde e pintol mum
(Marku 8.31-9.1; Luka 9.22-27)*

²¹ Diga wakkati mum, Yeesu fuđđi faamingo aahiiße mum wi'i e haani o yaha Urusaliima. Ton dottiibe e limaamiiße, e moodiibbe tawreeta tooroyta mo puy, 6e bara mo. Amma nyalaane tatawre, o fintan. ²² Den, Piyer yaari mo sera, wooltani mo wi'i: «Joomiraawo, Alla hadu dum! Iri majjum tawataa maa!» ²³ Yeesu yeeyitii, wi'i Piyer: «An Seydan, wittu 6aawo am! A laati nun ko doyyatammi. Miilooji maa yiway to Alla, to himbe di yiwi!»

Tokkugo Yeesu

²⁴ Den Yeesu wi'i aahiiße mum: «Jidudo tokkugo am fu, acca miijaanaago hoore mum, etta leggal

mum palaanjal, tokkammi. ²⁵ Gam jiddo hisingo yonki mum, dullan ki. Amma, majjindo yonki mum gam am, hisinan ki. ²⁶ To neddo hebii huune fu der duuniyaaru do, ko yonki mum halki, ume dum nafi mo? Naa ume neddo waawata ko hokki gam sooditaago yonki mum? ²⁷ Gam Bii neddo waran e tedduŋal Baaba mum, e malaykaabe mum. Den o yoňan moy fu ko wadi der golle mum. ²⁸ E goonja batanmi on, tawaabe do, woňbe mum maayataa, ko 6e ji'a Bii neddo e warida e laamaare mum.»

17

Tagudi Yeesu waylitake

(Marku 9.2-13; Luka 9.28-36; 2 Piyer 1.16-18)

¹ Baawo balde jeego'o, Yeesu yahidi e Piyer e Yaakuuba e minyum Yuhaana. O yaari 6e sera, faa dow waanne towune. ² Tagudi makko waylitii yeeso maňbe. Yeeso makko e jalba hande naanje, gineeji makko rawni tar hande jayŋol. ³ Muusa e Eliya suppitanii 6e, e badda e makko. ⁴ Piyer etti haala wi'i Yeesu: «Joomiraawo, wonaago men do e woodi. To aa yidi, mi darnan do bukaaji tati: an wooru, Muusa wooru, Eliya wooru.»

⁵ O heennyay batugo, ko duulel jalboowel gom wari ommi 6e. Don daane gom yiwi der duulel ŋel, wi'i: «Oo do laatii Biddo am jidaado, mo cubumi. Kettinanee mo!»

⁶ No aahiibe nani daane nen, 6e jani, 6e kippii e leydi, 6e kuli sanne. ⁷ Yeesu ɓattii, meemi 6e, wi'i: «Ummee, to on kulee.» ⁸ Den, 6e ɓanti gite, 6e ji'ay goddo, sey Yeesu tan.

⁹ No 6e jippotoo diga dow waanne nen, Yeesu waggini 6e, wi'i: «To on batee goddo ko ji'udon, faa to Bii neddo fintii diga e maaybe.» ¹⁰ Den, aahiiþe makko yami mo, wi'i: «Gam ume ko moodiþbe tawreeta e wi'a: "Eliya nun artata wara"?» ¹¹ O toontii 6e, o wi'i: «Goorja nun, Eliya nun artata wara, moyyina huune fu. ¹² Amma mii wi'a on, Eliya wari ko. Amma 6e annitay mo, 6e gadanii mo ko 6e jidi fu. Hande non 6e toorirta Bii neddo bo.»

¹³ Aahiiþe faami no haala Yuhaana gadoowo batisi nun o batanta 6e.

*Yeesu nyawtii suka mo ginnawol toorata
(Marku 9.14-29; Luka 9.37-43)*

¹⁴ No 6e bittoy to jama'aare woni, gorko gom wari jicci yeeso Yeesu. ¹⁵ O wi'i: «Joomiraawo, yurma biyam gorko! Ginnool nun woni e makko, enjol toora mo puy. To ɳol ummanake mo, enjol doyya mo der yiite, nokkun bo der diyam. ¹⁶ Mi yaarii mo to aahiiþe maa, amma 6e baaway ko nyawti mo.»

¹⁷ Yeesu toontii, wi'i: «Hey, onon himþe jaamanuuru hallunu, 6e walaa goondinki! Faa dey gondanmi e moodon? Faa dey tokkanmi mun-yango on? Gaddanee am mo do!» ¹⁸ Yeesu falmi ginnool tawaanjol der suka on, ɳol wurtii, o yoofii don maa don.

¹⁹ Baawo majjum, aahiiþe makko yami mo kamþe tan, wi'i: «Ume acci men baaway ko riiwi ginnool ɳol?» ²⁰ Yeesu toontii 6e, wi'i: «Gam goondinki moodon e faandi. E goona batanmi on: To goondinki moodon e foti baa hande binjel mutaadihi, on baawan ko wi'i waanne nee do: "Eggu

do, jahaa to,” ne eggan bo. Walaa ko tampoton wadugo. ²¹ [Amma, ginnool hande ɳol do wur-tataako to hinaa e du'aare, e suumaye.]»

*Yeesu batanii maayde e pintol mum de dīdawre
(Marku 9.30-32; Luka 9.43-45)*

²² No 6e boositintoo der leydi Galili, den Yeesu wi'i 6e: «Bii neddo wattete der juude himbe. ²³ Be baran mo, amma nyalaane tatawre o fintan.»

Berde aahiibe makko biisii puy, no 6e nani ka.

Yeesu yobii ceede faada

²⁴ No Yeesu e aahiibe mum yottii Kafarnahum, jaaboobe ceede faada suudu Alla 6attii Piyer, wi'i mo: «Moodibbo moodon yobataa woni ceede faada suudu Alla?» ²⁵ Piyer toontii, wi'i: «Oo yoba.» No Piyer naati der wuro, Yeesu arti etti haala, wi'i: «Simon, ume miiludaa? Bey nun haani yoba ceede faada? Bibbe genni nun naa hobbe?» ²⁶ Piyer toontii, wi'i: «Hobbe nun haani yoba.» Yeesu wi'i mo: «Den, bibbe genni haanay yoba. ²⁷ Amma, gam to en laatana himbe fergere, yahu maayo. Tuunnu malimali maa, pitodaa linnol ɳol artudaa nanjudaa. Den ɳaabaa hunnuko maggol, a tawan ceede cardi der son. Ikkinaa de, jobanaa en, min e maa.»

18

*Burdo manju der Laamaare Alla
(Marku 9.33-37; Luka 9.46-48)*

¹ Wakkati majjum, aahiibe Yeesu battii, yami mo, wi'i: «Moy buri manju der Laamaare Alla?»

² Yeesu noddi sukayel, darni ɳel yeeso maabbe,

³ wi'i: «E goonja batanmi on: to on baylitaaki

laatidon hande sukahon petton, on naatoytaa der Laamaare Alla. ⁴ Gam majjum, leesindo hoore mum, hande sukayel ñel do, kanko nun surata manju der Laamaare Alla. ⁵ Jaðbiido sukayel pettel hande ñel do, e inne am, min nun joomum jaðbii.»

Manju hakke

(Marku 9.42-48; Luka 17.1-2)

⁶ «Amma to goddo doyyii sukahon petton, goondinkon am, gooten mum der hakke, dum buranno hoyango mo, o haðbanee namarde e daane, o faddee caka maayo. ⁷ Bone laatanii duuniyaaru nuu, gam woodi ko doyyata himþe der hakke. Wadataako ko doyyata himþe waray, amma bone laatanto laatiido daliila majjum!

⁸ To junjo maa, dum bo koyjal maa nun wadinte hakke, wudditin de boppaa to woddi. Dum burante woodugo, naataa aljanna e koyjal gootal, dum bo e junjo wooto, e no paddirtedaa e koyde maa didi, dum bo e juude maa didi der yiite tabitiinne. ⁹ To bo itere maa nun wadintee hakke, doofu ne boppaa to woddi. Dum burante hoyugo naataa aljanna e itere woore, e no paddirtedaa e gite maa didi der yiite jahannama.»

Ballool dow baalel majjuñel

(Luka 15.3-7)

¹⁰ «Kakkilee, to on jawee baa gooten der sukahon petton kon. Gam mii wi'a on, malaykaabé makkon, e darii wakkati fu, dow kammu e daara yeeso Baaba am gonudo dow kammu. [¹¹ Gam Bii nedðo warii hisingo majjuñe.]

¹² Kaye miiludon? To neddo e woodi baali hewre, go baala goota majji, o accataa lasooji naay e sappo e jeenay koriidi dow waanne, o daartaa majjuuña ḥan na? ¹³ E goonja batanmi on: to o yiitii ḥa, o seyorto ḥa bura lasooji naay e sappo e jeenay koriidi, di majjay. ¹⁴ Hande non Baaba moodon gonudo dow kammu yidaa baa gooto, der sukahon kon, majja.»

Yaafanaago banniraawo

¹⁵ «To banniraawo maa woofanii maa, yahu to makko an tan, kollaa mo onon dido. To o nootike, a hebitake mo. ¹⁶ Amma to o hettinaaki ka kollataa mo, den wittu, jahidaa e neddo gooto, dum bo dido, gam haala kan moyyinee yeeso seedeewe dido, dum bo tato. ¹⁷ To o salike hettinanaago 6e, den batu ka Eklesiya. To o salike hettinanaago Eklesiya bo, den fu daaree mo hande keefeero, dum bo jaboowo ceede faada.

¹⁸ E goonja batanmi on: Huune fu ko calidon e leydi do, salaama dow kammu. Ko ja budon e leydi do, ja bete bo dow kammu.» ¹⁹ Mii bata on kade e goonja: «To himbe dido e duuniyaaru do nannantirii dow huune ko 6e eelata, Baaba am gonudo dow kammu hokkan 6e dum. ²⁰ Gam to himbe dido dum bo tato e hawritii e inne am, mi na'on caka maabbe.»

Ballool gollotoodo caliido yaafaago

21 Den Piyer battii Yeesu, yami mo, wi'i: «Joomi-raawo, de noy nun haani mi yaafano banniraawo am to o woofanii am? De jeedidi na?» **22** Yeesu toontii mo, wi'i: «De jeedidi tan bane bi'umaa mi, amma de lasoy tati e sappo faa de jeedidi.

²³ Hande non Laamaare Alla e nandi e laamiido gom jidudo gollotoobe mum liisanoo dum jawdi muudum. ²⁴ No o fuddi liisaade, be gaddani mo joganiido mo ceede cardi miliyooji duuddsi. ²⁵ Gorko on woodaa ko yobirta mo. Den, laamiido on hokki laawolo sippee, kanko e deekiiko, e sukaabe makko, e ko o woodi fu, gam o yoba nyamaane nen. ²⁶ Gollotoodo on jicci yeeso makko, eeli mo, wi'i: "Joomiraawo Munyanam, mi yobete fu!" ²⁷ Joomiraawo on yurmii mo, yaafanii mo nyamaane nen, acci mo, o yawti.

²⁸ No o wurtii, o fotti e banniraawo makko joganiido mo ceede cardi hewre. O gattii mo, o deddsi daane makko, o wi'i: "Yobam ceede am!" ²⁹ Banniiko jicci, eeli mo, wi'i: "Munyanam, mi yobete!" ³⁰ Amma o jaabay. O yaari mo o maaboy der kasu, faa de o yobidi nyamaane nen fu. ³¹ No banniraabe makko gollotoobe horiise yi'i ko wadi, mone maabbe ummii puy, be jahi be batoy joomiraawo maabbe ko wadi. ³² Den, joomiraawo on nodditii gollotoodo on, wi'i mo: "An gollo-toodo kalludo! Mi yaafanakeno maa nyamaane joganinodaa am fu, gam a sawrinii am. ³³ An bo, haanayno jurmodaa banniraawo maa hande no jurmoriimaa mi na?" ³⁴ Mone wadi joomiiko, watti mo e juude hiitotoobe. O maabaa der kasu, faa de o yobidi nyamaane nen fu. Den Yeesu beydi wi'i:

³⁵ "Hande non Baaba am gonudo dow kammu wadanta on to moy moodon fu yaafanaaki banniraawo mum e berne woore."»

Ekkitinol dow ceergal

(*Marku 10.1-12; Tokkitaaki. Tawreeta 24.1-4; Matiye 5.31-32; Luka 16.18*)

¹ No Yeesu heennyi fillaaji din, o yawti diga Galili, o yahi Yahudiya, far fonjo maayo Urdun.

² Jama'aare duunne e tokki mo, den o nyawti ton nyawbe.

³ Wobbe der Farisaabe wari to makko, yami mo gam jarboo mo, wi'i: «Gorko e woodi laawol seera debbo mum, baa to gam daliila kaye nun na?» ⁴ O toontii 6e, o wi'i: «On janjay ko winnaa e dewtere na? Diga fuddoode Alla tagii gorko e debbo.» ⁵ O wi'i: “Gam majjum gorko accan baaba mum e innalum, takkontira e debbo mum, 6e fu dido, 6e laatoo bannu gootol.”» ⁶ Hande non 6e laatataako kade dido, amma bannu gootol. Den kan, to neddo seennu ko Alla hawti.

⁷ Farisaabe ben yami mo, wi'i: «Gam ume ko Muusa wi'i gorko hokka debbo derewol ceergal to oo seera mo?» ⁸ Yeesu toontii 6e, wi'i: «Gam sabbu yoorugo berde moodon nun acci ko Muusa hokki on laawol cereron rewbe moodon. Amma diga fuddoode, dum laataakino non. ⁹ E goonja bi'anmi on, cerudo debbo mum to hinaa gam daliila jeenu, to o hoowi goddo, o wadii jeenu.»

¹⁰ Aahiiibe makko wi'i mo: «To non non nun haala gorko e debbo laatii, gomma to neddo bañu.»

¹¹ Yeesu toontii 6e, wi'i: «Himbe fu bane waawata ko jaibi haala kan, sey 6e Alla hokki dum tan. ¹² E woodi rimaabe e laatii waatoraabe. Wobbe bo himbe nun watti 6e dum. Wobbe kan 6anjataa gam daliila Laamaare Alla. Baawudo ko jaibi haala kan fu, jaiba!»

*Yeesu du'anake sukahon petton
(Marku 10.13-16; Luka 18.15-17)*

¹³ Baawo majjum, himbe waddani Yeesu sukahon petton, gam o yowa juude makko dow makkon o du'anoo kon, amma aahiiße makko nya-asitii 6e. ¹⁴ Den Yeesu wi'i 6e: «Accee sukahon petton wara to am, to on kadee kon, gam Laamaare Alla laatani nun wa'ube hande makkon.» ¹⁵ O yowi juude makko dow makkon, den o yawti diga don.

*Yeesu e gojankeejo jom jawdiijo
(Marku 10.17-31; Luka 18.18-30)*

¹⁶ Gojankeejo gom battii Yeesu, yami mo, wi'i: «Moodibbo, booddum ume haani mi wada, go mi heba yonki tabitiiki?» ¹⁷ Yeesu wi'i mo: «Ko wadi aa yamammi dow ko woodi? Alla tan woni booddo! To aa yidi hebugo yonki tabitiiki, sey tokkaa sariyaaji.» ¹⁸ Gorko on yami Yeesu, wi'i: «Diye nun sariyaaji din?» Yeesu toontii mo, wi'i: «Taa waru neddo, taa jeenu, taa wujju, taa seeda fewre. ¹⁹ Teddin baaba maa e inna maa, den jidaa banniraawo maa hande no jidiraa hoore maa.» ²⁰ Gojankeejo on wi'i mo: «Mii jogii sariyaaji dii don fu. Ume nun horii kade?» ²¹ Yeesu wi'i mo: «To aa yidi laatodaa kebbudo, yahu cippaa ko goodudaa, kokkaa talakaabe ceede majjum. Den a heban jawdi dow kammu. Baawo majjum, garaa tokkaa am.»

²² No gojankeejo on nani haala kan, yawti e berne biisiine, gam o laati nun jom jawdiijo. ²³ Den, Yeesu wi'i aahiiße mum: «E goonja batanmi on, edum sadii jom jawdiijo naata der Laamaare Alla! ²⁴ Mii batitoo on ka kade, edum buri hoyugo,

jelooba wurtoroo e hinere baatal, e no jom jawdiijo naatirta der Laamaare Alla.» ²⁵ No aahiiibé makko nani ka, haaynaare nannji dum, wi'i: «Den, moy waawata ko hisi?» ²⁶ Yeesu daari 6e, wi'i: «E himbe, dum don wadataako, amma to Alla, huune fu wadoto.»

²⁷ Den, Piyer etti haala wi'i mo: «Minon, men accii huune fu men tokki maa. Ume nun laatantoo men?» ²⁸ Yeesu wi'i 6e: «E goona batanmi on, to huune fu laatinaama kesum, Bii neddo joodoto e kittaal laamaare tedduŋal makko. Den, onon sappo e didi, kiitodon lenyi Isira'iilaabé sappo e didi. ²⁹ Neddo fu accudo wuro mum, e sakikiraabé mum worbe e rewbe, e baaba mum, dum bo inna mum, e sukaabé mum, e gese mum, gam am, o heban ko buri dum, kade bo, o heban yonki tabitiiki. ³⁰ Amma duubbe ardiibe jooni, laatoto sakitiibe, duubbe der sakitiibe jooni bo, laatoto ardiibe.»

20

Ballool gollotoobe der gesa innabooje

¹ «Laamaare Alla e nandi e jom gesa innabooje. O wurtii subaka kecco, gam o daarta gollotoobe, o yaara to gesa innabooje makko. ² O nannantiri e gollotoobe, o yoba be nyalaane fu ceede cardi goote. Den o yaari be gesa makko. ³ O wurtii jaka yande jeenay, o tawi wobbe e joodii der luumo, woodaa gadeteenjal. ⁴ O wi'i 6e: "Jahee gollodon, onon bo der gesa innabooje am, mi yoban on ko haani," ⁵ kambe bo be jahi. Jom gesa on witti kade caka nyalooma e yanne tati, o wadi hande

non. ⁶ Baawo majjum, wakkati yanne joy, o wurtii kade. O tawi wobbe e darii, woodaa gadeteenjal. O wi'i 6e: "Ume wadi ko oon nyalli daraago do, on goodaa gadeteenjal?" ⁷ Be toontii mo, 6e bi'i: "Men kebay ettudo men golle." O wi'i 6e: "Jahee onon bo gollodon der gesa innabooje am."

⁸ No kiikiide wadi, jom gesa on wi'i deenuudo jawdi mum: "Noddu gollotoobe 6en, jobaa moy fu ceede mum. Puddiraa sakitiibe, keennyitiraa ardiibe." ⁹ Ettanoobe golle deydey alaasara wari, moy maabbe fu hokkaa ceede cardi goote. ¹⁰ Ardinoobe etteego golle bo wari. Bee miiluno joddi maabbe buran ni 6ee to. Amma moy maabbe fu yobaa ceede cardi goote. ¹¹ No 6e jobaa, 6ee dumbitoo dow jom gesa on, ¹² 6ee bi'a: "Sakitiibe wari, yanne woore tan golii, ko potindaa 6e e minon golliibe nyalaane ne fu, der naanje e guli!" ¹³ Jom gesa on toontii gooto maabbe, wi'i: "Banniraawo am, mi farkanay maa. En nannantir bane dow ceede cardi goote nyalaane fu na? ¹⁴ Ettu joddi maa, dillu. Mii yidi yobugo cakitiido hande no maa. ¹⁵ Laawol hokkay am mi wadira ceede am no jidirmi na? A daairirii am e gite kallude gam mi wadii ko woodi na?" » ¹⁶ Yeesu wi'i: «Hande non sakitiibe laatortoo ardiibe, ardiibe bo laatoo sakitiibe.»

*Yeesu batanii maayde e pintol mum de tatawre
(Marku 10.32-34; Luka 18.31-34)*

¹⁷ No Yeesu yahata Urusaliima e aahiibe mum, o noddi sappo e dido 6en, feere mum, o wi'i 6e:
¹⁸ «Nani een jaha Urusaliima. Ton Bii neddo wattoyte der juude hooreebe limaamiibe, e moodibbe

tawreeta. Be kiitoto mo kiita maayde. ¹⁹ Be gattan mo der juude heeferþe, gam þe jaanca mo, þe piya mo looci, þe bila mo dow leggal palaanjal. Amma nyalaane tatawre, o fintan.»

*Elgal inna Yaakuuba e Yuhaana
(Marku 10.35-45; Luka 22.24-27)*

²⁰ Den, inna 6ibþe Jebede e sukaab  e mum 6attii Yeesu. O jiccia yeeso Yeesu gam o eela   um ballal. ²¹ Yeesu wi'i mo: «Ume jidudaa?» O toontii mo, o wi'i: «Mii yidi, to a laamike, nootodaa 6ibþe am dido 6ee do, gooto joodoo nyaamo maada, gooto bo nano maada.» ²² Yeesu toontii, wi'i: «On annaa ko eeloton am. On baawan ko yariri jarirgel   el jarirammi na?» Be toontii mo, 6e bi'i: «Men baawan.» ²³ O wi'i 6e: «Gooja nun, on baawan. Amma joodaago nyaamo am e nano am, min bane hokkata   um. Bee do Baaba am siryanii joonde den nun hebata de.»

²⁴ No aahiiþe sappo horiib  e nani ka, mone maab  e ummii dow banniraab  e maab  e dido ben. ²⁵ Den, Yeesu noddi 6e, 6e fu, wi'i 6e: «Oon anni hooreeb  e duuniyaaru, no boni nun jogorii himbe mum. Maw  e bo e Holla himbe mum baawde. ²⁶ Amma,   um wadataako hande non hakkune moodon. Jidudo laataago mawdo caka moodon fu, joomum laatoo jaggotoodo mon. ²⁷ Kade bo, jidudo ardaago e moodon fu, joomum laatoo maccudo moodon. ²⁸ Hande non, Bii neddo waray gam jagganeego, amma, jagganaago himbe waddi mo, o hokkitira yonki makko gam sooditaago   uuþbe.»

*No Yeesu wuntiniri wumuþe dido
(Marku 10.46-52; Luka 18.35-43)*

29 Yeesu e aahiiþe mum e wurtoo Yeriko, go jama'aare ðuunne e tokki mo. **30** Wumuþe dido gom e joodinoo sera laawol. Be nani e wi'ee, Yeesu nun yawtata don, den þe janti þee kuuba, þee bi'a: «Joomiraawo Bii Dawda, yurma men!» **31** Jama'aare e falma þe gam þe jeedoo, amma þe þeydi huubugo e semme, þee bi'a: «Joomiraawo Bii Dawda, yurma men!» **32** Yeesu darii, noddii þe, wi'i: «Ume jidudon mi wadana on?» **33** Be toontii mo, þe bi'i: «Joomiraawo, wuntin men.» **34** Yeesu yurmii þe, meemi gite maþþe. Don maa don þe bumti, þe tokki mo.

21

*Yeesu naatii Urusaliima
(Marku 11.1-10; Luka 19.28-40; Yuhaana 12.12-19)*

1 No Yeesu e aahiiþe mum faanii Urusaliima, þe jottii Baytifaaji, takkol waanne wi'eteene waanne Jaytuuje. Yeesu lili aahiiþe dido. **2** O wi'i þe: «Jahee siire wonune yeeso moodon, to oon naata ne, on tawan babba e þinjel mum e habþii. Pittee di gaddanon am. **3** To goddo yamii on gokka fu, toontee mo: "Joomiraawo nun bucaa di." Don maa don, o accan on gaddon di.»

4 Dum wadii, gam hebbingo haala ka annabijjo batuno, wi'i:

5 «Batee þiþþe Siyoona, bi'on:
"Daaree, laamiido mon e wara e mon,
oo diggi, oo waddii babba,
e þinjel mum."»

6 Aahiiþe þen yahi, wadi ko Yeesu bati þe. **7** Be gaddi babba e þinjel mum, þe dadði toggoanje

maabbe dow majji, den Yeesu waddii. ⁸ Duubbe der jama'aare nen weyyiti gineeji mum dow laawol. Wobbe bo salti licce ledde, e weyyita dow laawol. ⁹ Ardiibbe Yeesu, e tokkinbe mo baawo fu, e hulgina e wi'a: «Hosana, Bii Dawda! Barke laatanoo garroowo e inne Joomiraawo! Hosana Joomiraawo mo dow kammu!»

¹⁰ No Yeesu naati Urusaliima, genni fu laawontirii. Himbe e yamontira, e wi'a: «Moy nun gorko oo do?» ¹¹ Jama'aare toontii, wi'i: «Yeesu annabiijo, mo Nasaratu, der leydi Galili nun.»

*Yeesu riiwii sippoobe e soodoobe der suudu Alla
(Marku 11.15-19; Luka 19.45-48; Yuhaana 2.13-22)*

¹² Yeesu naatii der suudu Alla. O riiwi sippoobe, e soodoobe, o hippi taaburuuji cengotoobe ceede, e kittaa je sippoobe tantabaraaji. ¹³ Den, o wi'i 6e: «Alla batii der Dewtere, wi'i: "Suudu am noddete suudu to du'aare wadetee." Amma onon, on gartirii ñol suudorde wuybe!»

¹⁴ Wumube e layoobe war i to makko der suudu Alla, go o nyawti 6e. ¹⁵ Hooreebe limaamiibe, e moodibbe tawreeta, mone mum ummi no yi'i kujje kayniide de Yeesu wadata, e no sukaabe hulginirta der suudu Alla, e wi'a: «Hosana Bii Dawda!» ¹⁶ Den 6e bi'i: «Aa nana ko sukaabe ben batata na?» Yeesu toontii 6e, wi'i: «Mii nana. On meeday ko jannji haala kaa do na? "A hebii maanteego diga e kunnude sukaabe, e musinoobe."»

¹⁷ Den, o acci 6e, o wurtii siire nen, o yahi Baytaniya, o waaloy ton.

*Yeesu yaa'ike ibbi
(Marku 11.12-14, 20-26)*

18 Fini mum subaka, Yeesu dawi e witta der siire, go rafo wadi mo. **19** O hollirii ibbi sera laawol. O yaali to makki, amma o taway godsum, sey baafe tan. Den o bati ibbi kin, o wi'i: «A rimataa biiþe kade faa abada!» Don maa don, ibbi kin yoori. **20** No aahiiþe makko yi'i dum, haaynaare nanji dum, den be yami mo, be bi'i: «Noy ibbi kin yooriri don maa don?» **21** O toontii be, o wi'i: «E goonja batanmi on: To oon goondini, on gaday seko, on gadan ko buri ko ibbi kin wadanaa. On baawan ko wi'i, waanne nee do: "Doofa diga do, yantoy der maayo," dum laatoto bo. **22** To oon goondini, ko eeludon e du'aare fu, on keban dum.»

*Yahuduubē e yama diga toy baawde Yeesu yiwi
(Marku 11.27-33; Luka 20.1-8)*

23 Yeesu naati der suudu Alla. No o waajotoo, hooreeþe limaamiiþe, e dottiþe Yahuduubē battii, yami mo, wi'i: «E baawde dey gadirtaa kujje dee? Moy hokku maa baawde majjum?» **24** Yeesu toontii be, wi'i: «Min bo, mi yaman on yande goote. To on toontike am, mi batan on e baawde dey nun gadiranmi huune dum. **25** Moy lili Yuhaana wadsa himþe batisi? Alla nun, naa himþe?» Be baddi hakkune maþþe, be bi'i: «To en bi'i "Alla nun", o wi'an: "Den, ume wadi go en goondinay Yuhaana?" **26** Amma to en toontike bi'uden "himþe nun", een kula himþe bo, gam himþe fu e daari Yuhaana hande annabijjo.»

27 Be toontii Yeesu, be bi'i: «Men annaa.» Kanko bo, o wi'i be: «To non min bo, mi batataa on to e baawde dey nun gadiranmi kujje dee.»

Ballool rindaabe dido

²⁸ Yeesu ɓeydi wi'i: «Kaye miiludon e ballool ɲol do: Gorko gom nun woodunoo sukaaɓe worɓe dido. O bati arano, o wi'i dum: "Suka am, yahu gollodaa to gesa innabooje." ²⁹ Suka on toontii, wi'i: "Mi yahataa." Amma ɓaawo nii, o miijiti, o yahi. ³⁰ Baaba on noddi suka didabo, wi'i mo ka o wi'unoo arano on. Oo don toontii, wi'i: "Woodi Baaba, mi yahan" Amma o yahay. ³¹ Der kambe dido ɓen, moy nun e maɓbe wadi ko baaba mum yidi?» Be toontii, ɓe bi'i: «Arano on nun.» Den, Yeesu wi'i ɓe: «E goonja batanmi on, jaɓoobé ceede faada, e kaaruwaabe artan on naatoygo Laamaare Alla. ³² Gam Yuhaana warii caka moodon, hollii on laawol foonnaare, on jaɓay haala makko. Amma jaɓoobé ceede faada e kaaruwaabe goondinii mo, go onon yi'uɓe dum, on tuubay goondindon mo.»

*Ballool gesa innabooje
(Marku 12.1-12; Luka 20.9-19)*

³³ «Kettinee ballool gonjol kade. Neddo gom nun tiggi gesa innabooje mum. O wadi kowaagol kara, o filtini ka. O wasi gayka to ɓibbe innabooje biddetee, o mahi suudu towukoldeenirkol der gesa ka. Baawo mum, o accani ka gollotoobé makko ɓe gadí haya, den o wadi jahaajal. ³⁴ No wakkati gorugo innabooje yottii, o lili gollotoobé makko to reeninaabe gesa, ɓe gaddanaa mo gedu makko der ɓibbe innabooje den. ³⁵ Amma reeninaabe gesa ɻan nannji lilaabe ɓen, fiyi gooto, gooto bo, ɓe bari dum, tatabo ɓe paddi dum kaaye, ɓe bari. ³⁶ Jom gesa on lilitii gollotoobé mum, burube arandeeɓe duufsugo. Reeninaabe gesaa, wadani ɓe no wadannoo arandeeɓe. ³⁷ Faa sakitiine, o lili

biyiiko gorko to maßbe, o wi'i: "No wadi fu, be teddinan biyam." ³⁸ Amma no reeninaabe gesa yi'i mo, be bi'ontiri hakkune maßbe: "Kanko woni donoowo gesa ḷan. Garee baren mo, donen ḷal!"» ³⁹ Den, be nanji mo, be paddi mo baawo gesa, be bari mo. ⁴⁰ Jooni noo, to jom gesa innabooje on wari, noy o wadata be?»

⁴¹ Be toontii mo, be bi'i: «O halkan reenube hallube ben halkere naawune. Den o hokkan wobbe gesa ḷan, wada haya, baawoobe ko hokki mo gedu makko, to wakkati borol biibbe fotii.»

⁴² Baawo majjum, Yeesu wi'i be: «On meeday janjugo ko winnaa der dewtere na?
"Hayre ne mahooibe woppi,
kayre laatii hayre jogiine maadi."
Kanjum woni golle Joomiraawo,
edum haaynii e gite meeđen!»

⁴³ Gam majjum, mii wi'a on: «Laamaare Alla sottinte caka moodon, ne hokkee himbe lenyi janani, wadoobe ko Alla yidi. ⁴⁴ [Neddo janudo dow hayre nen, heltoto. Mo ne yanti dow mum fu bo, muun-yitinto.]»

⁴⁵ No hooreebe limaamiibe e Farisaabe nani ka, be paami kambe nun Yeesu wadani ballaaji dii. ⁴⁶ Bee daarta laabi no be nanjirta mo, amma bee kula himbe, gam himbe fu e daari mo annabijjo.

22

Ballool dow ɓangal (Luka 14.15-24)

¹ Yeesu baddi be kade e ballaaji, wi'i: ² «Laamaare Alla e nandi hande laamiido gom gadudo julde ɓangal biyum. ³ O lili gollotoobe makko noddanaa

mo noddinaabe julde 6angal. Amma noddinaabe ben yiday warugo. ⁴ O lili kade gollotoobe makko wobbe, o wi'i be: "Bi'ee noddinaabe ben, huune fu siriyaama, ga'i e baali payudi hiisaama, huune fu gasii, be gara nyaamde." ⁵ Amma noddinaabe yeebii noddoore nen, hiinnii haajuuji mum. Oo do yawtiri gesa mum, oo to bo yawtiri daartiru mum. ⁶ Horiibe nannji gollotoobe, toori be, wari be. ⁷ Mone laamiido ummii puy. O lili soogeeji makko yaha halkaa himbe ben, wuuda ci'e maabbe. ⁸ Baawo majjum, o wi'i gollotoobe makko: "Nafa 6angal benni, amma noddinanoobe fotay nyaamugo ka. ⁹ Gam majjum, jahee to fottirde laabi, noddon be tawudon don fu wara." ¹⁰ Gollotoobe ben yahi to fottirde laabi, noddi be tawi don fu, hallube e woodube fu, faa suudu hebbi himbe.

¹¹ Laamiido naati gam daara noddinaabe mum. O hollirii goddo gom, mo bornaaki gineeji 6angal. ¹² O battii mo, o wi'i: "Banniraawo am, noy naatirdaa do go a bornaaki gineeji 6angal?" Amma, oo jeedii. ¹³ Den, laamiido wi'i gollotoobe mum: "Kaabbee mo, koyde e juude, boppon yaasi, der niwre. O wulla ton, o yakkontira nyiye." »
¹⁴ Yeesu tokki wi'ugo: «Noddaabe e duudi, amma subaabbe duudaa.»

*Yobugo laamiido Roma ceede faada
(Marku 12.13-17; Luka 20.20-26)*

¹⁵ Farisaabe yahi baddoy dow no be nannirta Yeesu der haala mum. ¹⁶ Be lili aahiiibe maabbe wobbe, e be Eroodu, be bi'i mo: «Moodibbo, emen anni a laati nun goonjaajo. E goonja nun janjinirtaa laawol Alla, a hulataa bo himbe, gam a burontirtaa himbe. ¹⁷ Den, batu men ko miiludaa dow haala

kaa do: E haani men joba laamiido Roma ceede faada naa haanay?»

¹⁸ Amma Yeesu e anni miilooji 6erde maabbe kalludi. O toontii 6e, o wi'i: «Onon munaafitiibe! Ume wadi ko oon daarta jammaago am? ¹⁹ Kollee am ceede jobirteeede den.»

Be gaddani mo ceede cardi goote. ²⁰ O yami 6e, o wi'i: «Foto moy e inne moy woni do?» ²¹ Be toontii, 6e bi'i: «Laamiido Roma nun.» Den o wi'i 6e: «To non, kokkee laamiido Roma ko laatanii dum, kokkon Alla bo ko laatanii dum.»

²² No 6e nani ka o toontii, haaynaare nanji 6e. Den 6e acci mo, 6e jawti.

Pintol maaybe

(Marku 12.18-27; Luka 20.27-40)

²³ Der nyalaane woore nen, wobbe yiwoy diga e waalde Sadukiibe. Kambe nun yeddata, e wi'a maaybe fintataa. Be gari to Yeesu, 6e yami mo, ²⁴ 6e bi'i: «Moodibbo, Muusa wi'i: "To goddo maayii rimay babbbe, minnyiiko naatta debbo on, gam o darina lenyol mawniiko maayudo." ²⁵ Dum wadiino caka amen dow wobbe rindaabe jeedido. Arano baaji debbo, maayi, rinday e makko. Minnyiiko naatti debbo on. ²⁶ Kanko bo o maayi, o rinday mo biddo. Tatabo bo non non, faa 6e fu jeedido ben. ²⁷ Baawo maabbe 6e fu, debbo on bo maayi. ²⁸ Den, nyalaane darjal, to maaybe fintoy, moy nun e maabbe, o laatoytoo debbo mum, dow kambe jeedido ben? Gam 6e fu 6e koowiino mo.»

²⁹ Yeesu toontii 6e, wi'i: «On majjii, gam on paamay Dewte, on annaa baawde Alla bo. ³⁰ To maaybe fintii, worbe baajataa, rewbe bo baajataake,

6e laatoto nun hande malaykaabé tawaabé dow kammu. ³¹ Dow haala pintol maaybé, on jannjay ko Alla wi'i on na? O wi'i: ³² "Min woni Alla Iburahiima, Alla Isiyaaku, e Alla Yaakuubu." Alla laataaki Alla maayubé, amma Alla wuuruubé.»

³³ Jama'aare hettinaniine mo, haaynaare nannji dum e ekkitinol makko.

*Sariya 6uruka mawnugo
(Marku 12.28-34; Luka 10.25-28)*

³⁴ No Farisaabé nani Yeesu muubbii kunnude Sadukiibé e haala, 6e gadí hawriine. ³⁵ Gooto maabé, laatiido jannjinoowo Sariya, yidi jarbaago Yeesu, yami mo, wi'i: ³⁶ «Moodibbo, sariya kaye 6uri mawnugo der dewtere tawreeta?» ³⁷ Yeesu toontii mo, wi'i: «"Yidu Alla Joomiraawo maa e 6erne maa fu, e yonki maa fu, e hakkillo maa fu." ³⁸ Kanka woni sariya arana, 6uruka manju. ³⁹ Sariya didaba nanduka e makka nani: "Yidu banniraawo maa, hande no jidirfaa hoore maa." ⁴⁰ Ko tawreeta Muusa e dewte annabiibé batifu, e darii dow sariyaaji didí díi.»

*Almasiihu e Dawda
(Marku 12.35-37; Luka 20.41-44)*

⁴¹ No Farisaabé hawritii, Yeesu yami 6e, wi'i: ⁴² «Ume miiloton dow Almasiihu? Bii moy nun?» Be toontii mo, 6e bi'i: «Bii Dawda nun.» ⁴³ Den Yeesu wi'i 6e: «Noy Dawda noddiri mo "Joomiraawo?" Ruuhu Alla holli mo dum, gam majjum o wi'i: ⁴⁴ "Joomiraawo wi'i Joomam:
Jooda nyaamo am,
faa mi wada jaabaa waybé maa."»

45 To Dawda noddii mo "Joomiraawo", den, noy o laatortoo 6iyiko?»

46 Be fu 6e baaway ko toontii mo gokka. Diga nyaanne mum, goddo suusay ko yami mo yande godde.

23

*Yeesu felii moodibbe tawreeta e Farisaabe
(Marku 12.38-40; Luka 11.37-54; 20.45-47)*

1 Den, Yeesu baddi jama'aare e aahiibe mum, wi'i: **2** «Moodibbe tawreeta e Farisaabe, yowanaama janningo tawreeta Muusa. **3** Gam majjum, nananee 6e, gadee huune fu ko 6e bi'i on. Amma to on gadee ko 6e gadata, gam 6ee bata, amma 6e gadataa ko 6e bat. **4** Bee kabba doolle teddude, 6ee doonina himbe dow balbe mum. Amma kambe, 6e jidaa meemugo de baa e kollel. **5** Ko 6e gadata fu, 6ee gada dum gam himbe yi'ana 6e. Kanjum acci 6ee binna aayaaje dow laayaaji, 6e kabba e tiide, e dow came maabbe. Bee juutina sariiji toggoanje maabbe. **6** Bee jidi joonde arandeeje to 6e noddinaama nyaamde. Bee jidi joonde burde teddugo, der cuudi baajordi. **7** Bee jidi sanneego caka jaayri to jama'aare hawritii, e noddeego "Moodibbo". **8** Amma onon, to on nootee noddedon "Moodibbo", gam moodibbo gooto tan goodudon, onon kan, on fu oon banniraabe. **9** To on noddee goddo "Baaba" e duuniyaaru do, gam Baaba gooto tan goodudon, kanko woni gonudo dow kammu. **10** To on jabee noddeego "Hooreejo", gam hooreejo gooto tan goodudon, kanko woni Almasiihu. **11** Burudo mawnugo caka moodon laatoo gollantoodo horiibe. **12** Mawnindo

hoore mum fu, leesinte. Leesindo hoore mum bo, mawninte.»

*Yeesu e gacco munaafitaare
(Marku 12.40; Luka 11.39-52; 20.45-47)*

¹³ «Bone laatanto on, onon moodibbe tawreeta e Farisaabe, munaafitiibe! gam oon mabbana himbe dammugal Laamaare Alla. Onon e ko'e mon on naatataa, on accay yidube naatugo bo, naata. [¹⁴ Bone laatanto on onon moodibbe e Farisaabe munaafitiibe! Oon teeta cuudi gowniibe, oon juutina du'aaje gam himbe mana on. Gam majjum, on kiitete kiita buruka naawugo.]

¹⁵ Bone laatanto on, onon moodibbe tawreeta e Farisaabe, munaafitiibe! Gam oon boositoo leyde, e maayo fu, gam kebon baa gooto tokka on. To on kebii mo, laatinon mo bii yiiteejo, de didi, bura no moodon.

¹⁶ Bone laatanto on, onon wumuþe ardiibe! Oon bi'a: "To neddo hunorake suudu Alla, dum laataaki godsum. Amma to o hunorake kanjeeri suudu Alla, doole o hebbina hunayeere makko."

¹⁷ Onon majjuþe, e wumuþe! Ume buri mawnugo, kanjeeri na, naa suudu Alla laabinooþol kanjeeri?

¹⁸ Oon bi'a kade: "To neddo hunorake hiisirde dum laataaki godsum. Amma to o hunorake sadaka cakkaaka dow hiisirde, doole o hebbina hunayeere makko." ¹⁹ Onon wumuþe! Ume nun buri mawnugo: sadaka kiisaaka na, naa hiisirde laabinooþe sadaka kan? ²⁰ To non kunoriido hiisirde, hunorake hiisirde e ko woni dow maggol fu. ²¹ Kunoriido suudu Alla, hunorake ñol e Alla tawaado der mayru. ²² Kunoriido kammu bo,

hunorake gurol Laamaare Alla, e Alla joodiido dow maggol.

²³ Bone laatanto on, onon moodibbe tawreeta e Farisaabe, munaafitiibe! Gam oon cutta jakka haakooji bi'eteedi maantu, e anisa, e kume, amma oon jeeboo ko buri teddugo der tawreeta, kan woni foonnitaare, e endam, e goondinki. Amma to on jeebee ko horii. ²⁴ Onon wumube ardiibe! To buubol yanii der jaram moodon, oon cekoo, ikkinon nol, amma oon moda jeelooba!

²⁵ Bone laatanto on, onon moodibbe tawreeta e Farisaabe, munaafitiibe! Gam oon layba baawo jarirkon, e baawo keede. Amma der majje e heewi huune ko wujja, e ko teetaa. ²⁶ An Farisaajo bumdo! Laybu taw der jarirkon e der keede, den baawo majje bo laaban.

²⁷ Bone laatanto on, onon moodibbe tawreeta e Farisaabe, munaafitiibe! Gam oon nandi hande caabeeje dawninaade. Yaasi majje e woodi, amma der e hebbi yiye maayube, e huune ko sobi fu. ²⁸ Onon bo, hande non laatidon. Dow gite himbe, oon nandi hande foonnitiibe, amma der moodon e hebbi munaafitaare, e luudaare.

²⁹ Bone laatanto on, onon moodibbe tawreeta e Farisaabe, munaafitiibe! Gam oon maha jenaale annabiibe, oon boodina caabeeje foonniibe. ³⁰ Den oon bi'a: "To men na'onno wakkati kaakiraabe amen, men kawtataano e maabbe dow barki annabiibe ben." ³¹ Hande non, nootoridon onon nun laatii biibbe warunoobe annabiibe. ³² To non, kebbinee golle de kaakiraabe moodon fudduno! ³³ Onon biibbe bolle pure! Noy baawirton ko dadi yiite jahannama? ³⁴ Gam

majjam, mii lildana on annabiibē, e hakkilbē, e moodibē tawreeta. On baran wobē, tiggon wobē, wobē, piyon dum looci, der cuudi moodon baajordi, tooron bē, der ci'e e ci'e. ³⁵ Alla hiitoto on sabbu yiyyam himbē foonnitiibē, baraabē. Dum fuddan diga yiyyam Habiila, poonmitiido, faa yiyyam Jekariya, bii Barakiya, mo barudon hakkune suudu Alla e hiisirde. ³⁶ E goonja batanmi on: Huune dum fu, tawan himbē jaamanuuru nuu do!

*Yeesu yurmike himbē Urusaliima
(Luka 13.34-35)*

³⁷ «Urusaliima, Urusaliima! an baroowo annabiibē, e padsoowo bē Alla lildanoy maa kaaye! De duuddsum jidumi hawritingo bībē maada hande no gertogal hawritirta coppi mum ley biyeede mum. Amma on jabay. ³⁸ Gam majjam, on accante genni moodon laatoo bille. ³⁹ E goonja batanmi on, on ji'ataa am kade faa nyalaane bi'oyton: "Barke woodani garoowo e inne Joomiraawo!"»

24

*Pusol suudu Alla e keennyol duuniyaaru
(Marku 13.1-37; Luka 21.5-24; 17.22-37)*

¹ Yeesu wurtii suudu Alla, e yawta, ko aahiiibē makko bātii, e holla mo no suudu Alla ḥol mahiraa. ² Den, o wi'i bē: «On ji'i huune dum fu na?» E goonja batanmi on: «Baa hayre yowataako dow wonne, dum fu, dum pusete.»

³ Yeesu yahi joodoy dow waanne wi'eteene waanne Jaytuuje, den aahiiibē makko wara kambe tan, yami mo, wi'i: «Batu men dey nun dum wadata.

Maane ney nun hollitinta garki maa e keennyol duuniyaaru?» ⁴ Yeesu toontii 6e, wi'i: «Kakkilee, to on accee goddo majjiina on. ⁵ Gam duubbe waran e inne am, 6e bi'a, kambe nun woni Almasiiihu. Be majjinan himbe duubbe. ⁶ On nanan habaru-iji konuubi e rimmo konuubi e batanee, amma to on kulee! Doole nun dum wada, amma timmoode bane don taw. ⁷ Lenyol ummanto lenyol hawre. Laamaare ummanto laamaare bannun hawre. Rafo e dimmaade leydi wadan der nokku-uje godde. ⁸ Dum don fu laati nun hande fuuddoode hatawre.

⁹ Den himbe wattan on e juude wobbe gam tooredon, baredon. Lenyi fu wanyan on gam inne am. ¹⁰ Wakkati mum, himbe duubbe accan goondinki, 6e jammontiran, 6e banyontira hakkune maabbe. ¹¹ Annabiibe fewoobe duubbe waran, 6e majjinan himbe duubbe. ¹² Hallande yahan e duuda faa yidde himbe duubbe feewta. ¹³ Amma munyudo faa timmoode, hisan. ¹⁴ Linjiila dow Laamaare Alla wajete der duuniyaaru fu, gam dum laatanoo lenyi fu seedaaku. Den, timmoode duuniyaaru waran.»

*Tooraaji mawdī e wara
(Marku 13.14-23; Luka 21.20-24)*

¹⁵ «Gam majjum, to on ji'ii "karmudum, nyiddudum", dum annabi Daniyel batannoo e darii dow nokkuure ceniine, den sey janjoobe ka wada hakkillo. ¹⁶ Den, tawaabe Yahudiya fu dogga eenca baalle. ¹⁷ Tawaado dow suudu bo, to wi'a jippoto etta ko woni der suudu. ¹⁸ Tawaado gese bo, to wittu wuro ettoygo toggoore mum. ¹⁹ Bone laatanto rewbe gaambe, e musinteebe der

nyalaade den! ²⁰ Du'ee, gam to doggudu moodon laatoo wakkati dabbune, dum bo nyalaane siwteteene. ²¹ Gam, toora mawka laatoto, hande makka meeday ko wadii diga duuniyaaru fuddi faa jooni, hande makka bo wadataa kade faa abada. ²² To nyalaade den buyaakano juutugo, goddo hisataano. Amma Alla buytii de sabbu subaabé mum.

²³ Wakkati mum, to goddo wi'ii on: "Almasiihu nani do," naa bo "o nani to," to on goondinee. ²⁴ Gam almasiihuubé e annabiibé fewrekuubé waraan. Be gadan kaayefiji mawdfi, e haaynaareeji duuddi, gam be majjina baa e subaabé, to wadoto. ²⁵ Paamee wooda, mi seedinii on dum diga dum waray.

²⁶ To goddo wi'ii on: "O na'on der haro," to on jahee ton. Naa bo to be bi'ii on: "O na'on der cuudi," to on goondinee. ²⁷ Hande no maayyere maayyirta dow kammu diga lettugal faa gorgal, hande non Bii neddo bo warirta. ²⁸ To baatudum woni fu, ton nun digaareeje hawritintoo.»

Wittoyo Almasiihu (Marku 13.24-31; Luka 21.25-33)

²⁹ «Don maa don, 6aawo nyalaade billaaje den, naanje niiban, lewru accan yaynugo, koode yanan diga dow kammu, baawde gonude dow kammu fu dimmoto. ³⁰ Den, maane Bii neddo hollitinto dow kammu. Lenyi himbe duuniyaaru fu simoto. Be ji'an Bii neddo e wara diga kammu, der duule, e baawde mawde, e teddujal. ³¹ Walaldu mawnu fuurete. O lilan malaykaabé makko der goorajje leydi naay, lettugal e gorgal, sobbiire e hoore fudo,

gam hawritingo subaaabe makko wonube der duuniaaru fu.

Ballool ibbi
(Marku 13.28-31; Luka 21.29-33)

³² Paamee ko ibbi ekkitinta. To licce makki e wilita, e wada haako, oon anni dunju faanike.
³³ Hande non, onon bo, to on ji'ii huune ko batanmi do fuddi wadugo, annitee wakkati Bii neddo faanike, oo darii dammugal wuro. ³⁴ E goonja batanmi on: Himbe jaamanuuru nu do maayidintaa go huune dum fu laatoo. ³⁵ Kammu e leydi heennyen, amma haala am heennyataa faa abada.»

Alla tan anni nyalaane darjal
(Marku 13.32-37; Luka 17.26-30, 34-36)

³⁶ «Amma nyalaane e wakkati majjum, walaa annudo dum. Baa malaykaabe wonube dow kammu annaa, baa Biido bo. Walaa annudo dum sey Baaba tan. ³⁷ Hande no dum laatino der jaamanu Nuuhu, hande non garki Bii neddo bo laatoto. ³⁸ Go ilam tufaana wara, himbe e nyaamanno, e yaranno, e baajanno, e baajana biibbe mum, faa nyalaane Nuuhu naati laana diyam. ³⁹ Be mijaanaaki dum, faa ilam tufaana wari halki be be fu. Hande non garki Bii neddo bo laatorto. ⁴⁰ Wakkati mum, worbe dido wonoto der gesa, gooto ettee, gooto accee. ⁴¹ Rewbe dido namidan dow namarde woore, gooto ettee, gooto accee. ⁴² To non, deenee, gam on annaa wakkati de Joomiraawo moodon warata. ⁴³ Paamee kaa do: To jom wuro e anni wakkatiire ne gujjo warata jemma, o daanataako.

O accataa gujjo yula suudu makko. ⁴⁴ Gam ma-jjum, kakkilee onon bo, gam Bii neddo waran der wakkatiire ne on miilay.»

*Gollotoodo geeto e gollotoodo kalludo
(Luka 12.41-48)*

⁴⁵ «Moy woni gollotoodo kooliniido, kakkildo? Kanko woni mo joomiraawo mum yowani dum himbe wuro mum gam o hokka be nyaamdu der wakkati kaanuki. ⁴⁶ Barke laatanto gollotoodo mo joomiraawo mum warti tawi e hiinnii golle mum. ⁴⁷ E gooja batanmi on: Joomiiko yowanen mo jawdi mum fu. ⁴⁸ Amma to gollotoodo on e laatii kalludo, o wi'an der 6erne makko: Joomiraawo am booyan, wartay, ⁴⁹ den o yanta oo fiya banniraabe makko gollotoobe, oo nyaamida, oo yarida e yaroobe. ⁵⁰ Kanko, joomiiko wartan nyalaane ne o miilanay, e wakkatiire ne o annaa. ⁵¹ Joomiiko hiitoto mo kiita naawuka, o heba riiba e munaafiiibe. Den o wullan, o yakkontira nyiiye.»

25

Balool dow gati sappo di annaa worbe

¹ «Nyalaane mum, Laamaare Alla nandan e gati sappo di annaa worbe ettudi fitillaaji mum, wurtii gam fottoyo e jommanjo gorko. ² Joyo maabbe e laatii naabiibe, joyo bo yoyube. ³ Naabiibe ben etti fitillaaji mum, amma be ettay nebbam goddam. ⁴ Yoyube kan etti fitillaaji mum, hawri e paali nebbam goddam. ⁵ No jommanjo jenji waray, be fu be noji, be daani.

⁶ Faa caka jemma, huubaanjo nanaa, wi'i: "Jommanjo gorko nani, burtee, pottee e makko!" ⁷ Den

6e fu 6e pini, 6ee moyyina fitillaaji ma66e. ⁸ Gati joy
 jaabiidi wi'i banniraabe mum yoyube: "Kokkoree
 men nebbam moodon sedda, gam fitillaaji amen
 na'on nyifa." ⁹ Yoyube toontii 6e, wi'i: "Aawo
 nebbam dam men goodi heyataa en, en fu. Ja-
 hee to sippoo6e, coodee dam moodon!" ¹⁰ No
 6e jawti soodogyo nebbam, jommanjo gorko yot-
 tii. Waduno6e siri mum naatidi e makko der
 wuro to 6angal wadata, den dammugal ma66aa.
¹¹ No 6ooyi sedda, joyo horiib6e wittoy, e huuba, e
 wi'a: "Joomiraawo, Joomiraawo, ma66itan men!"
¹² Amma o toontii 6e, o wi'i: "E goona batanmi on,
 mi annaa on."

¹³ Gam majjum Yeesu wi'i: «Deenee, gam on
 annaa nyalaane, düm bo wakkatiire de Bii nedđo
 warata.»

*Ballool gollotoobe tato
 (Luka 19.12-27)*

¹⁴ «Dum nandan hande gorko gom ciriyido
 wada jahaanjal. Den o noddi gollotoobe makko, o
 yowani 6e jawdi makko. ¹⁵ O hokki arano ma66e
 ceede cardi keme joy, didabo, ceede cardi keme
 didi, tatabo bo, ceede cardi hewre, moy fu jika
 baawde mum. Den o yawti genni makko. ¹⁶ Don
 maa don, gollotoodo kokkaado ceede cardi keme
 joy, yahi tenkorii de, de diibi ceede cardi keme joy
 godde. ¹⁷ Kokkaado ceede cardi keme didi bo, wadi
 hande non, kanko bo o riibii ceede cardi keme
 didi godde. ¹⁸ Amma kokkaado ceede cardi hewre,
 yahi wasi gayka, uwi don ceede joomiraawo mum
 hokki düm.

¹⁹ No 6ooyi, joomiraawo ma66e warti, noddi 6e,
 6e liiso, 6e kolla no moy ma66e fu wadiri golle

mum. ²⁰ Kokkaado ceede cardi keme joy wari, waddi ceede cardi keme joy godde, wi'i: "Joomiraawo, ceede cardi keme joy de kokkudaa am riibake keme joy godde." ²¹ Joomiiko wi'i mo: "Golle maa woodii sanne, an gollotoodo geeto, koolaado. No a laatike koolaado e huune ko faandi, mi hokkete ko buri dum mawnugo. War naatu ceyododaa e am!" ²² Gollotoodo kokkanoodo ceede cardi keme didi wari kanun bo, wi'i: "Joomiraawo, ceede cardi keme didi de kokkudaa am riibake ceede cardi keme didi godde." ²³ Joomiiko wi'i mo: "Golle maa woodii sanne, an gollotoodo geeto, koolaado. No a laatike koolaado e huune ko faandi, mi hokkete ko buri dum mawnugo. War naatu ceyododaa e am!" ²⁴ Kokkaado ceede cardi hewre wari kanun bo, wi'i: "Joomiraawo, mii anni a laati nun neddo cadudo: Aa rugga ko a aaway, aa gotta ko a hawritay. ²⁵ Gam majjum kulumi, jahum cuudoymi ceede maa der leydi. Jabu ceede maa!" ²⁶ Joomiiko toontii mo, wi'i: "An gollotoodo kalludo, ciiwaakuujo! Aa annunoo mii rugga ko mi aaway, mii gotta ko mi hawritay, ²⁷ den, ume wadi ko a wattay ceede am der banki, to mi wartiino mi jabanno de e riiba majje. ²⁸ Teetee ceede makko den, kokkon goodudo ceede cardi keme joy. ²⁹ Gam goodudo nun beydantee faa duuda. Amma mo woodaa, baa sedda ko woodi teetete. ³⁰ Gollotoodo mo nafataa on, paddee mo yaasi der niwre, o wulla ton, o yakkontira nyiliye."

Bii neddo hiitoto himbe nyaanne daryal

³¹ «To Bii neddo warii e teddunjal mum e malaykaabe fu, o joodoto dow kittaal laamaare makko ɳal teddunjal. ³² Himbe lenyi duuniyaaru

fu, hawritinto yeeso makko. O seenniran himbe hande no duroowo seennirta baali e be'i. ³³ O resan baali, junjo makko nyaamo, o resa be'i bo, junjo makko nano. ³⁴ Den, laamiido wi'an wonube junjo mum nyaamo: "Garee, onon be Baaba am barkidini, jabee donju laamaare ne ciriyanadon diga fuddoode duuniyaaru. ³⁵ Gam rafo wadii am, on nyaannii am, mi fondaama, on jarnii am, mi laatino kodo, on bernii am. ³⁶ Mi wonake funtu, on koltinii am, mi nyawii, on nyawtii am, mi maabaaamaa der kasu, on daaroyii am." ³⁷ Den, foonnitiibe toontoto mo, wi'a: "Joomiraawo, dey men ji'u maa aa rafi, men nyaannu maa, naa dey men ji'u maa aa dondii, ko men jarnu maa? ³⁸ Dey men ji'u maa aa latii kodo, men beernu maa, naa dey men ji'u maa aa woni funtu go men koltin maa? ³⁹ Dey men ji'u maa aa nyawi naa bo aa maabaa der kasu, men daaroy ma?" ⁴⁰ Laamiido on toontoto be, wi'a: "E goonja batanmi on: ko gadandon gooto der burudo faandugo caka sakikiraabe am bee, min nun gadandon dum."

⁴¹ Baawo majjum, o wi'an wonube junjo makko nano: "Dillee woddi am, onon ya'aabe! Naatee der yiite tabitiije, desanaanje Ibiliisa e malaykaabe mum! ⁴² Gam rafo wadii am, on nyaannay am, donka wadii am, on jarnay am, ⁴³ mii laatino kodo, on beerinay am, mi wonino funtu, on koltinay am, mi nyawii, maabaaami der kasu, on daaray am." ⁴⁴ Den, be toontoto mo kambe bo, be bi'a: "Joomiraawo, dey men ji'i rafo e wadee, dum bo donka e wadee, maa bo aa latii kodo, naa bo aa woni funtu, maa bo aa nyawi, naa aa maabaa

der kasu, ko men ballay maa?” ⁴⁵ O toontoto
be o wi'a: “E goonja batanmi on: ko on gadanay
gooto der burube faandugo, min woni on gadanay
dum.” ⁴⁶ Den kambe, be jahan der billaare tabiti-
ine, amma foonnitiibe heban yonki tabitiiki.»

26

*Mawbe Yahuduubē e dawra no nanjirta Yeesu
(Marku 14.1-2; Luka 22.1-2; Yuhaana 11.45-53)*

¹ No Yeesu heennyi wadugo fillaaji din fu, o wi'i
aahiiibe makko: ² «Oon anni balde didi nun horii go
juulde Paska wada, Bii neddo bo wattete e juude
himbe, be tigga mo dow leggal palaanjal.»

³ Wakkati mum, hooreebe limaamiibe e dottiibe
wadi hawriine der wuro hooreejo limaamiibe,
bi'eteedo Kayafas. ⁴ Be nannantiri be nanja Yeesu
e yoyre, be bara mo. ⁵ Amma be bi'i: «To en gadee
dum wakkati juulde, gam to himbe ummin fitina
caka jama'aare.»

*Debbo gom moomii wardi dow hoore Yeesu
(Marku 14.3-9; Yuhaana 12.1-8; Luka 7.36-50)*

⁶ Yeesu e wonuno Baytaniya der wuro Simon
ceccefo. ⁷ No be nyaamata, don debbo gom battii
Yeesu, e jogii faanu gadiraanjol hayre albaatiri
kebbuŋol wardi, ðam ceede duudde. O waanji ðam
dow hoore Yeesu. ⁸ No aahiiibe makko yi'i dum,
berde mabbe welay, be bi'i: «Gam ume wardi ðam
biisaa baanji? ⁹ Dam waaweteno sippeego ceede
duudde, de ceennanee talakaabe.»

¹⁰ Yeesu faanti ko be batannoo, wi'i be: «Gam
ume ko oon toora debbo on? O wadanii am golle
boodde. ¹¹ Gam talakaabe e wondi e moodon

wakkati fu. Amma min, mi wondataa e moodon wakkati fu. ¹² O moomii bannu am wardi, gam sirtyaago uwol am. ¹³ E goonja batanmi on: To linjiila waajetee e duuniyaaru do fu, ko debbo on wadi batante, siwtorte bo.»

Yahuuda jammake Yeesu

(*Marku 14.10-11; Luka 22.3-6*)

¹⁴ Den Yahuuda Iskariyot, gooto der aahiiþe sappo e dido, yahi to hooreeþe limaamiiþe. ¹⁵ O wi'i þe: «Ume kokkoton am to mi wattanii on Yeesu der juude mon?» Be limi ceede cardi laso e sappo, þe kokki mo. ¹⁶ Diga wakkati majjum, oo daarta laabi no o jammortoo Yeesu.

Yeesu nyaamii hiraane Paska e aahiiþe mum

(*Marku 14.12-31; Luka 22.7-34; Yuhaana 13.1-38*)

¹⁷ Nyalaane arandeere, der juulde peen ko yuufinaaka, aahiiþe Yeesu wari, yami mo, wi'i: «Toy jidudaa men ciriyane hiraane Paska?» ¹⁸ O toontii þe, o wi'i: «Jahee siire, naaton wuro waane, bi'on mo: "Moodibbo wi'i, wakkati mum faanike, der wuro maada nun o nyaamata juulde Paska e aahiiþe makko."» ¹⁹ Aahiiþe wadi ko Yeesu bati dum, þe ciryii hiraane Paska.

²⁰ No kiikiide wadi, o joododii e aahiiþe makko sappo e dido, bee nyaama. ²¹ Wakkati þe nyaamata, Yeesu wi'i þe: «E goonja batanmi on: gooto moodon jammoto am.» ²² Berde maþþe biisii puy, go bee yama mo gooto gooto, moy fu e wi'a: «Joomiraawo, min bane hinaa?» ²³ O toontii þe, o wi'i: «Tummidindo junjo mum e am der heedo, joomum nun jammotoo am.» ²⁴ E goonja Bii neddo dillan hande no Dewte bati dow makko. Amma bone

woodani jammido mo! To o rimaakano, dum burananno mo woodugo.»

²⁵ Yahuuda, jammotoodo mo, yami mo, wi'i: «Moodibbo, min nun naa?» O toontii mo, o wi'i: «A batii ka.»

Kirtaari ceniini
(Marku 14.22-26; Luka 22.14-20; 1 Korintu 11.23-25)

²⁶ No 6e nyaamata, Yeesu etti peen, yetti Alla, ηappiti, hokki aahiiße mum, wi'i: «Jabee, nyaamee, kanjum woni 6annu am.» ²⁷ Baawo majjum, o etti jarirgel innabojam, o yetti Alla, o hokki 6e, o wi'i: «Jaree on fu. ²⁸ Kanjam laatii yiyyam am, yiyyam alkawal, deyyitiidam gam yaafuye hakkeeji himbe duu6be. ²⁹ Mii wi'a on: Mi yarataa innabojam ðam kade faa abada, sey nyalaane jaridanmi kesam e moodon, der Laamaare Baaba am.»

³⁰ Baawo 6e jimi jimol, 6e burtii, 6e jahi waanne Jaytuuje.

Yeesu wi'i Piyer yeddan dum
(Marku 14.27-31; Luka 22.31-34; Yuhaana 13.36-38)

³¹ Den Yeesu wi'i aahiiße mum: «Jemmaare nee do, on fu, on accan am, gam e winnaa der dewtere: "Mi fiyan duroowo, den hoggo baali sankito."»

Yeesu 6eydi, wi'i: ³² «Amma baawo to mi fintii, mi artan on Galili.» ³³ Den Piyer, wi'i mo: «Baa to 6e fu 6e accii maa, min kan mi accataa maa pay.» ³⁴ Yeesu toontii mo, wi'i: «E goonja batan maa mi: Jemmaare nee do, ko jakaraari jogga, a wi'an de tati a annaa am.» ³⁵ Piyer wi'i mo: «Baa to doole mi maayida e maa, mi wi'ataa pay mi annaa maa.» Aahiiße fu wi'i, hande non.

*Yeesu e du'oo der Gesemane
(Marku 14.32-42; Luka 22.39-46)*

³⁶ Baawo majjum, Yeesu e aahiiße mum yottii nokkuure wi'eteene Gesemane. O wi'i 6e: «Joodee do, faa mi wadaa du'aare.» ³⁷ O yaadi e Piyer, e 6ibbe Jebede dido, ko berne makko fuddi biisaago, oo maata toora berne puy. ³⁸ Den o wi'i 6e: «Biisere berne sattanii am faa e yidi warugo am. Gon ee do, deenidee e am.» ³⁹ O woddi sedda, o yani o hippii e leydi, oo du'oo, oo wi'a: «Baaba, to wadoto, woddinanam jarigel toora kaa. Amma ko jidudaa laatoo, hinaa ko jidumi.»

⁴⁰ O wittoy, o tawi 6ee daani. O wi'i Piyer: «On baaway ko reenidi e am baa yan ne woore na? ⁴¹ To on daane, du'ee, gam to on janee der jarbeeji. Gam berne e yidi, amma bannu tampii.»

⁴² O witti du'aago kade de didawre, o woddi sedda, o wi'i: «Baaba, to wadataako jarigel toora nel yawta, mi yariray nel, den, accu yidde maa laatoo!»

⁴³ Yeesu wittoy kade, o tawi 6e 6ee daani, gam doyjol e jogii 6e puy. ⁴⁴ O acci 6e kade, o witti du'aago de tatawre e boliide goote den. ⁴⁵ Baawo majjum, o wittoy to aahiiße makko, o wi'i 6e: «Faa jooni on na'on daani, oon ciwtii na? Wakkati wadii! Bii neddo wattete der juude hakkee6e. ⁴⁶ Ummee jawten! Jammotoodo am nani wara!»

*Nanjoore Yeesu
(Marku 14.43-50; Luka 22.47-53; Yuhaana 18.3-11)*

⁴⁷ Yeesu heennyay batugo, go Yahuuda, gooto der aahiiße makko sappo e dido yottii, e himbe

duuþþe, jogiïþe kaafaaje, e cabbi. Hooreeþe li-maamiïþe, e dottiïþe nun liloy þe. ⁴⁸ Jammotoodo mo on tintiniinoo þe maane, wi'i: «Neddo mo cannumi e mammilaade fu, kanko nun don. Nannjee mo.» ⁴⁹ Don maa don, Yahuuda 6attii Yeesu, wi'i mo: «Jam kirden Moodibbo!» Den o mammilii mo. ⁵⁰ Yeesu toontii mo, wi'i: «Igo am, waðu ko waddu maa.» Himþe 6en 6attii, watti Yeesu junjo, nanni mo. ⁵¹ Den gooto der wondunoþe e Yeesu solti kaafahi mum, jabbi maccudo hooreejo li-maamiïþe, setti nowru, ⁵² go Yeesu wi'i mo: «Wittin kaafahi maa der kuunþal mum, gam kabiroowo e kaafahi, e kaafahi nun joomum halkirta. ⁵³ Aa miili mi waawataa ko noddi Baaba am lildanaanmi ko buri malaykaabé konunkeeþe ukke sappo e didi don maa don na? ⁵⁴ Amma to dum laataaki non, noy ko winnaa der Dewtere hebbirta? Gam dewtere wi'i, non dum laatotoo.»

⁵⁵ Den, Yeesu wi'i jama'aare: «Daa on garii nanjugo am e kaafaaje, e cabbi hande pasotoodo ni. Der suudu Alla bane gonunoomi de weeti fu, emi janjina, go on nanjay am? ⁵⁶ Amma huune dum fu wadii gam ko winnaa der dewte annabiïþe hebba.» Den, aahiiþe makko fu doggi, acci mo.

*Hooreeþe diina Yahuduúþe hiitake Yeesu
(Marku 14.53-65; Luka 22.54, 63-65; Yuhaana 18.12-13, 19-24)*

⁵⁷ Nannjuþe Yeesu 6en yaari mo to Kayafas hooreejo limaamiïþe, go moodibþe tawreeta, e dottiïþe genni, hawritii. ⁵⁸ Piyer e tokki mo 6awþawre, diga wodði, faa der fageere wuro hooreejo limaamiïþe. O naati, o joododii e reenuþe gam o yi'a no dum heennyitirta.

⁵⁹ Hooreebe limaamiibe, e dawroobe fu, e daarta fewre ne be gaccorto Yeesu gam o waree. ⁶⁰ Himbe duubbe wari seedii fewre dow makko, amma be kebay gacce potude warugo mo. Den, worbe dido gom wari, seedii ⁶¹ wi'i: «Kanko nun wi'unoo pusan suudu Alla, mahitoo njol der balde tati.» ⁶² Hooreejo limaamiibe ummii, wi'i Yeesu: «A toontataako gokka na? A nanay ka be batata dow maa na?» ⁶³ Amma Yeesu toontaaki gokka. Hooreejo limaamiibe on wi'i mo: «Mii eele e inne Alla yonkinteejo, batu men to an nun woni Almasihu, Biddo Alla.» ⁶⁴ Yeesu toontii mo, wi'i: «A batii ka. Ka batanmi woni: Diga jooni, on ji'an Bii neddo e joodii nyaamo Jom Baawde, o waran diga dow kammu.»

⁶⁵ Den, mone wadi hooreejo limaamiibe faa serkiti toggoore mum, wi'i: «O batii kalluka dow Alla! En kaajaaka seedeebe gom kade! On nanii e noppi moodon kalluka ka o bati. ⁶⁶ Ume ji'udon?» Be toontii, be bi'i: «Emo haani wareego.» ⁶⁷ Den, be tuuti mo joode e yeeso, bee piya mo guyye. Wo6be mabbe e fiya mo meeeye, ⁶⁸ e wi'a: «Almasihu! Tinta, moy nun fiyu maa.»

*Piyer yeddi wi'i annaa Yeesu
(Marku 14.66-72; Luka 22.55-62; Yuhaana 18.15-18, 25)*

⁶⁹ Piyer e joodii yaasi fageere wuro. Horbe tawaabe don, gooto mum, battii mo, wi'i: «An bo, aa wondunoo e Yeesu Galilinkeejo.» ⁷⁰ Amma Piyer yeddi ka yeeso himbe fu, wi'i: «Mi faamay ko jidudaa wi'ugo.»

⁷¹ Baawo majjum, o ummii oo foonnii far dammugal wuro. Kordo goddo yi'i mo, wi'i

wonþe don: «Gorko oo do e wondunoo e Yeesu Nasaratuujø.» ⁷² Piyer yeddi kade, wi'i: «Mi hunike, mi annaa gorko on.»

⁷³ No wadi tifere, wonuþe don 6attii Piyer, wi'i mo: «Seko walaa, a laati nun gooto der aahiiþe makko, gam batu maa e holitta to yiwudaa.» ⁷⁴ Den, Piyer hunii wi'i: «Alla hiitoo am to mi fewii, e goonja mi annaa gorko on!» Wakkati mum, jakaraari joggi. ⁷⁵ Den Piyer siwtorii ka Yeesu batunoo dum, wi'i: «Go jakaraari jogga, a wi'an de tati a annaa am.» O wurtii yaasi, o wulli bojji kaadudi.

27

Yeesu yaaraama to Pilaatu (Marku 15.1; Luka 22.66-71, 23.1)

¹ Subaka kecco, hooreeþe limaamiþe, e dottiþe fu, hawritii e dawra dow no þe barirta Yeesu. ² Be kaþbi mo, þe jaari to Pilaatu, hooreejo jeyde leydi Yahudiya.

Maayde Yahuuda Iskariyot (Golle Lilaabe 1.18-19)

³ No Yahuuda jammido Yeesu yi'i o hiitaama o waree, o miijiti, o wittini ceede cardi laso e sappo de o jaþunoo to hooreeþe limaamiþe, e dottiþe, ⁴ o wi'i þe: «Mi wadii hakke, mi jammike mo walaa gacce!» Be toontii mo, þe bi'i: «Ko faalii men? Haala maa nun!» ⁵ Yahuuda woppi ceede ðen der suudu Alla, yahi haþþitoyii boggol, maayi. ⁶ Hooreeþe limaamiþe etti ceede ðen, wi'i: «Sariya meeden hokkay laawol ceede hande dee do hawritee e ceede cakkanaade Alla der suudu Alla, gam ceede yiiyam nun.»

⁷ Baawo dawriine maabbe, be nannantiri, be etti ceede den, be coodiri gesa mahoowo payande gom, gam hobbe e uwee ton. ⁸ Kanjum acci faa hanne, gesa jan e noddee «Gesa Yiiyam.» ⁹ Hande non annabaaku Yeremiya hebbiri, nu o wadunoo, o wi'i: «Be ettii ceede cardi laso e sappo, kanje nun himbe Isira'iila tawi o foti yobaneego. ¹⁰ Be coodirii de gesa mahoowo payande, hande no Joomiraawo batunoo am.»

Yeesu yeeso Pilaatu

(Marku 15.2-20; Luka 23.1-4, 13-25; Yuhaana 18.28-19.16)

¹¹ Be jaari Yeesu yeeso Pilaatu hooreejo leydi, o yami mo, o wi'i: «An woni laamiido Yahuduubé na?» Yeesu toontii mo wi'i: «A batii ka.» ¹² Den hooreebe limaamiibe, e dottiibe gaccii mo, amma o toontaaki gokka. ¹³ Ko Pilaatu wi'i mo: «A nanataa gacce de be batata dow maada fu na?» ¹⁴ Amma Yeesu toontaaki gokka mum. Dum haaynii hooreejo leydi on sanne.

Yeesu hiitaama waree

(Marku 15.6-15; Luka 23.13-25; Yuhaana 18.39-19.16)

¹⁵ Der Juulde Paska fu, hooreejo leydi e woowi yoofango be maabbaado gooto, mo himbe yidi. ¹⁶ Wakkati mum, e woodunoo maabbaado annanaado, bi'eteedo Yeesu Barabbas. ¹⁷ No jama'aare hawritii, Pilaatu yami be, wi'i: «Moy jisudon mi yoofana on: Yeesu Barabbas na, naa Yeesu bi'eteedo Almasiihu?» ¹⁸ Pilaatu e anni sabbu nawniraagu nun wadi ko be nanji Yeesu be gaddi to mum. ¹⁹ Wakkati Pilaatu joodii e hiitoo, deekiiko lili goddo, wi'a mo: «Taa naannu hoore

maa der haala gorko mo walaa gacce oo, gam hanki mi toorake der koydool dow haala makko.»

20 Hooreebe limaamiiþe, e dottiib   yeeyi jama'aare,    yama Pilaatu yoofana    Barabbas, acca Yeesu waree. **21** Hooreejo leydi on yamitii   , wi'i: «Mi yoofanan on mabbaado gooto, moy nun der dido   en jidufodon mi yoofana on?» Be toontii,    bi'i: «Barabbas!» **22** Pilaatu yami   e, wi'i: «Den, noy gadanmi Yeesu bi'eteedo Almasiihu?» Be fu    toontii,    bi'i: «Tiggu mo dow leggal palaanjal!» **23** O yami   e, o wi'i: «Ko boni ume o wadi?» Be   eydi woolo e semme,   ee bi'a: «Tiggu mo dow leggal palaanjal!» **24** Pilaatu tawi waawataa ko deyyitini   e, woolo bo e   eydoo. Den o etti diyam, o looti juude makko yeeso jama'aare, o wi'i   e: «Mi walaa gacce dow reyyitingo yiyyam gorko oo. Haala moodon nun.» **25** Be fu    toontii,    bi'i: «Men ja  ii gacce yiyyam makko yowoo dow ko'e amen, e dow   ib  e amen!» **26** Den, Pilaatu yoofitani    Barabbas, o hokki laawol Yeesu fiyee looci,   aawo mum, o tiggee dow leggal palaanjal.

*Soogeeji jaancii Yeesu
(Marku 15.16-20; Yuhaana 19.2-3)*

27 Soogeeji hooreejo leydi yaari Yeesu der fageere laamorde mum, ukkere soogeeji din fu hawritii e tummi mo. **28** Be borti gineejii makko,   e borni mo gulunfaare wodeere. **29** Baawo majjum,   e canyi huuneere gi'e,   e kuunini mo. Be kokki mo helliiru e junjo makko nyaamo,   ee jiccoo yeeso makko,   ee jaanca mo,   ee bi'a: «Foo foo maa, laamii  o Yahuduub  e!»

³⁰ Be tuuti mo joode, 6e teeti helliiru ɳol, 6ee piya mo dow hoore. ³¹ No 6e keennyi jaancugo mo, 6e sorti gulunfaare, 6e borni mo gineeji makko. Den, 6e jaari mo 6e tiggaa dow leggal palaanjal.

*Yeesu tiggamaa dow leggal palaanjal
(Marku 15.21-41; Luka 23.26-49; Yuhaana 19.16-30)*

³² No 6e burtoto siire, 6e potti e gorko bi'eteedo Simon mo Sirene. Soogeeji dooli mo o roono leggal Yeesu palaanjal. ³³ Be jottii nokkuure wi'eteene Golgota. Maana Golgota woni (nokkuure le'al hoore). ³⁴ Be kokki Yeesu innabojam jillontiraadame kaadudum, o yara. No o metti ðam, o salii yarugo.

³⁵ No 6e keennyi tiggugo mo, 6e pidani gineeji makko tete, 6e ceenniri. ³⁶ Baawo majjum, 6e joodii don, 6ee deeni mo. ³⁷ Be binni dow alluwal daliila ko acci o tiggaa, 6e takki dow hoore makko. Ko 6e binni woni: «Oo do woni Yeesu, laamiido Yahuduube.» ³⁸ Fasotoobē ðido gom bo e tiggaa takkol makko, gooto nyaamo makko, gooto bo nano makko.

³⁹ Himbe falotoobē don e yenna mo, e dimma ko'e mum, ⁴⁰ e wi'a: «An pusoo wo suudu Alla, mahitoo ɳol der balde tati, faaba hoore maa. To a laati nun Biððo Alla, jippa diga e leggal palaanjal ɳal!»

⁴¹ Hande non, hooreebē limaamiibē, e moodibē tawreeta, e dottiibē fu jaanciri mo, e wi'a: ⁴² «O faabike wobbe, amma o waaway ko faabii hoore makko, kanko laamiido Isira'iila. Jooni, o jippoo diga leggal palaanjal ɳal, gam goondinen mo. ⁴³ O yowii hoolaare makko fu dow Alla. To non Alla

faaboo mo jooni, to e yidi mo. Gam o wi'i, o laati nun Biddo Alla.»

⁴⁴ Fasotoobe, tiggaabe takkol makko bo e yenna mo hande non.

Yeesu maayii

(*Marku 15.33-41; Luka 23.44-49; Yuhaana 19.28-30*)

⁴⁵ Diga caka nyalooma, niwre wadi e leydi nin fu, faa yottii yanne tati kiikiide. ⁴⁶ Jaka yanne tati kiikiide, Yeesu halbi e semme, wi'i: «Eloyi, Eloyi, lama sabaktani?» Kan woni «Alla am, Alla am! Gam ume accudaa am?» ⁴⁷ Wobbe der darinoobe don no nani dum, wi'i: «Emo nodda Eliya!» ⁴⁸ Don maa don, gooto maabbe doggi waddoy soosuuji, suuwi di der jaran lammudam, habbi e sawru, battini to hunnuko Yeesu gam o biccino. ⁴⁹ Den horiibe wi'i: «Munyen, daaren naa Eliya waran faaboo mo.» ⁵⁰ Baawo majjum, Yeesu halbi e semme, o maayi.

⁵¹ Wakkati mum, wudere wirniraane der suudu Alla serkitii caka caka, diga dow faa ley. Leydi dimmii, tepaaje feccii, ⁵² jenaale maabitii, seniibe duubbe maayunoobe finti. ⁵³ Be burtii e jenaale. Baawo mum, Yeesu finti, be naatidi e genni seniini, himbe duubbe yi'i be.

⁵⁴ Hooreejo soogeeji deenudo Yeesu, e soogeeji mum, yi'i dimmaade leydi e ko wadi fu. Be kuli puy, be bi'i: «E goonja, o laati nun Biddo Alla!» ⁵⁵ Rewbe duubbe e tawaa don e daara diga woddi, kambe nun tokkoynoo mo diga Galili, bee jagganoo mo. ⁵⁶ Der maabbe: E woodi Mariyama mo Magadala, e Mariyama inna Yaakuuba e Yusufu, e inna 6ibbe Jebede.

*Yeesu uwaama
(Marku 15.42-47; Luka 23.50-56; Yuhaana
19.38-42)*

⁵⁷ No kiikiide wadi, gorko jom jawdijjo gom, mo siire Arimatiya, wari. Emo wi'ee Yusufu, kanko bo o laati nun aahijjo Yeesu. ⁵⁸ O yahi to Pilaatu, o eeli dsum bannu Yeesu. Den, Pilaatu wi'i o hokkee ηολ. ⁵⁹ Yusufu etti bannu ηολ, suddi ηολ wudere heyre, ⁶⁰ o watti bannu ηολ der saabeere heyre ne o wasani hoore makko der hayre. Baawo mum, o talli hayre teddune, o maäbiri dammugal saabeere nen, o yawti. ⁶¹ Mariyama Magadalaajo, e Mariyama oo to, e tawaa don, e joodi e daari far to saabeere nen.

Soogeeji e reeni saabeere

⁶² Fini mum laatii nyalaane ardiine nyalaane siwteteene. Den hooreeße Limaamiiße e Farisaabe hawritii yahi to Pilaatu. ⁶³ Be bi'i mo: «Joomiraawo, men ciwtorii pewoowo on batiino diga e wuuri, wi'i, fintan nyalaane tatawre. ⁶⁴ Gam majjum, batu soogeeji reena saabeere nen faa balde tati den yawta. Gam to aahiiße makko wujju bannu makko, wi'a, o fintii diga maayße. Den fewre saki-tiineere nen buran arandeere hallugo.» ⁶⁵ Pilaatu wi'i be: «Soogeeji nani, jahee, deenee saabeere nen no baawirdon!»

⁶⁶ Be jahi, be deenoy saabeere nen. Be talli hayre, be maäbii faa woodi, be darini soogeeji gam reeña ne.

28

*Yeesu fintii
(Marku 16.1-10; Luka 24.1-12; Yuhaana 20.1-10)*

¹ No nyalaane siwteteene yawti, alal subaka, Mariyama Magadalaajo e Mariyama oo to dawi, yahi daaroygo saabeere nen. ² Don de woore, leydi dimmii e semme. Malaykaajo Joomiraawo jippii diga dow kammu, talli hayre nen, joodii dow mayre. ³ Oo jalbitoo hande maayyere, gineeji makko e rawni hande malamalluuje. ⁴ Reenube ben huli faa e diwna, 6e laatii hande maaybe. ⁵ Malaykaajo wi'i rewbe ben: «To on kulee onon! Mii anni Yeesu tigganoodo nun daartoton. ⁶ O walaa do, o fintii hande no o wi'unoo on. Garee, daaree to o fukkinoo. ⁷ Tinnee, batee aahiibe makko o fintii diga e maayde. O na'on hedii on far Galili, on ji'an mo ton. Ka goodumi mi bata on nun don.»

⁸ Rewbe ben yawti law diga to saabeere nen, go kulol e seyo wadi be puy. Be doggi be batoy aahiibe makko habaru on. ⁹ Don maa don, Yeesu fotti e mabbe, wi'i be: «Mii sanna on!» Be battii mo, be nannji koyde makko, be cujidani mo. ¹⁰ Den Yeesu wi'i be: «To on kulee! Jahee, batee banniraabe am, be jaha Galili. Ton nun be ji'atammi.»

Ka reenube saabeere seedii

¹¹ Wakkati rewbe ben yanti laawol, den wo6be der soogeeji deenudi saabeere nen naati e genni, e bata hooreebe limaamiibe ko wadi fu. ¹² Hooreebe limaamiibe, e dottiibe wadi hawriine, be baddi, be kokki soogeeji din ceede duudde, ¹³ 6e bi'i be: «Bi'ee aahiibe makko nun wari jemma, tawi oon daani, wujji bannu makko. ¹⁴ To hooreejo leydi nanii ka, minon nun anni ka batata mo, men burtina on e toora fu.»

¹⁵ Soogeeji jaabi ceede mum, wadi no wi'aa. Hande non haala kan sankitorii caka Yahuduubē faa warugo hanne.

*Yeesu holitanake aahiiþe mum
(Marku 16.14-18; Luka 24.36-49; Yuhaana
20.19-23)*

¹⁶ Aahiiþe sappo e go'o yahi Galili, dow waanne ne Yeesu tintinnoo þe þe jaha. ¹⁷ No þe ji'i mo, þe cujidani mo, amma wobþe maþþe wadii seko. ¹⁸ O 6attii, o wi'i þe: «Mi hokkaama baawde dow kammu e leydi fu. ¹⁹ Gam majjum jahee, gadee himþe lenyi fu aahiiþe am, gadee þe batisi e inne Baaba e Biddo e Ruuhu Ceniido. ²⁰ Jannjinee þe þe tokkoo ko batumi on fu. Annee, mii wondi e moodon nyalaane fu, faa timmoode duuniyaaru.»

**Alkawal Kesal
Portions of the New Testament in the Fulfulde Borgu
language of Benin**

copyright © 2011 SIM International

Language: Fulfulde Borgu (Fulfulde, Borgu)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-16

PDF generated using Haiola and XeLaTeX on 11 Nov 2022 from source files dated 9 Oct 2020

7104dd08-43ed-5b6c-bcfb-9f0e6052d5f3